

四庫全書

史部

欽定四庫全書

史部

福建通志卷四十四

詳校官監察御史臣陳化龍

檢討臣德生覆勘

總校官檢討臣何思鈞

校對官中書臣朱炳

謄錄監生臣蔣鳳生

欽定四庫全書

福建通志卷四十四

人物二

興化府

陳

鄭露

字恩叟祖昭自榮陽入閩居於永泰莆至陳時猶未知學露與其弟莊叔從永泰徙莆據南山之勝

構書堂以修儒業莆人化之遂為開莆來學露  
太府御莊中郎將叔別駕世稱南湖三先生

唐

林披

字茂則蒲田人祖元泰瀛州刺史父萬寵饒陽太守披少穎異過目成誦手鈔六經子史千餘卷天

寶十一年以明經擢第授臨汀曹掾俗尚鬼著無鬼論曉民以御史大夫李柄筠薦檢校太子詹事兼錄

州別駕贈睦州刺史子九人葦藻著薦  
粵蘊蒙邁莼皆官刺史號九牧林家

林蘊

字夢復披六子貞元四年以明經及第西川節度使韋臯辟為推官臯卒劉闢代之有反謀蘊曉以

順逆不聽欲殺之惜其才命行刑者以刀磨其頸以脅之蘊叱曰死則死我頸豈顧奴礪石耶闢知不可

屈釋之闢收蘊名重京師李吉甫李絳武元衡為相蘊貽書言安邊事甚悉置不用滄景帥程權辟掌書

記權上四州請吏而軍中挾權拒命不得出蘊為開陳大義衆始釋然遷禮部員外郎出為邵州刺史卒

余鎬

字周京其先家建陽咸通十年與閩踪歐陽毗長樂林慎思同第進士除校書郎乾符中羣盜起僖

宗荒嬉鑄與慎思疏諫不納以父老乞歸建州中  
間黃巢兵入閩克建州軍中謠言逢儒則辱師必覆  
鎬遂挈家避居於莆之黃石王氏據閩辟署賓客不  
就耕隱壺山後卒子訖公王氏時為古田今五世孫  
萬元祐  
進士

黃滔

字文江莆田人乾寧二年進士為監察御史充威  
武軍節度推官嘗規正閩王審知使終身不失臣

節朱溫移唐祚足跡遂不復西中州名士李絢韓偓  
羅隱輩避地皆主之著有文集十五卷及象山秀句  
集三  
十卷

宋

潘慎修

字成德莆田人以父承祐廕仕南唐李煜為起  
居舍人太祖征江南煜遣慎修隨其弟從鎰入

貢留館懷信驛已下江南捷書至郎吏促從鎡入賀  
慎修謂國且亡何賀也奉表待罪而已太祖嘉其得  
體授太常博士直秘閣初寇準數短慎修及準守鄧  
有告其不法者詔慎修驗治乃密疏準才堪將相所  
坐皆註誤不足罪時稱長者江南舊臣多言李煜闇  
懦真宗以問慎修對曰煜情理若此何以享國十餘  
年真宗以為不忘本深嘉獎之子汝士官  
至工部員外郎直集賢院汝礪奉禮郎

陳靖

字道卿莆田人父璧任陳洪進為泉州別駕勸洪  
進納土藝祖義之授膳部員外郎靖初補陽翟簿

契丹犯邊上機畧五策累遷太常博士太宗語議均  
田以興農事靖請命大臣為租庸使擇三司判官通  
知民事者為之貳先檢籍兩京荒地及逃民之產次  
募耕人賜以室廬牛犁青州縣勸課分殿最別賞罰  
然後量人授田度地均稅約井田之制頒行天下太  
宗謂呂端曰靖策正合朕意命為京西勸農使歷度

支判官轉運使以秘書監致仕卒贈尚書左僕射孫  
惟德字徽之歷知雷州罷採珠戶後知連州州有東  
湖舊為守圭田惟德收其息以  
還公帑官至虞部郎中致仕卒

李欣

字公愉莆田人太平興國八年進士歷階州推官  
以清謹聞擢知耀州時闕輔盜賊充斥欣陳討捕

之策踰月悉平後以屯田郎中知福  
州有善政民繪像祀之終諫議大夫

方慎言

字應之莆田人咸平三年進士知信豐蘭溪二  
縣祥符中以殿中丞擢屯田員外郎仁宗即位

改侍御史後知泉州歲饑大發官廩貸民又奏免丁  
稅父老感泣生子多以方名歷兩浙轉運使錢塘江  
決數十里慎言親庀工授材壘石立柱以殺潮勢賜璽  
書褒美改知潭州潭人像祀之入為諫議大夫會擇重  
臣鎮南越遂以朝請大夫知廣州卒贈開府儀同三司  
諡通熙寧初進士除王府翊善以子軫疏論蔡京罷職

方慎從

字維之慎言弟景德二年進士除知弋陽導江等縣歷潮漳嘉三州再知漳州改都官郎中以

老歸卒慎從在導江日有楠木連理嘉禾九穗之祥  
墜書褒異初守漳適慎言守泉旌麾相望二州榮之  
及再至漳人夾道歡呼曰吾父復來矣子諫臣侍父  
於漳手斷合水孽蛟死孫侂熙寧六年進士知安豐  
以薦赴都堂考察不肯私謁蔡京報罷後知侯  
官縣曾孫禧元符三年進士為殿中侍御史

方偕

字齊古興化人大中祥符五年進士為温州軍事  
推官歲饑民欲隸軍以就康食州難之偕詣提刑

呂夷簡曰民逼流亡不隸軍則聚而為盜矣夷簡從  
之改知福清有清操時典衣以自給累遷御史臺被  
詔勘澧州獄釋繫者三百人再遷侍御史安撫江  
南奏罷乳香錦綺之配於民間者仕終光祿卿

陳鑄

字師回興化人天聖五年進士知南雄州秩滿求  
判福州以便養母至則贊其守延良師增腴田以



教育後進復判陳州會有水患悉力拯援全活者衆  
歷知潮州登州以恤刑被勅書獎諭官至朝散大夫

光祿  
卿

蔡襄

字君謨仙遊人天聖八年進士為西京留守推官  
時范仲淹以言事去國余靖論救之尹洙請與同

貶歐陽修王素移書責司諫高若訥不言三人皆坐  
譴襄作四賢一不肖詩以識其事慶歷初仁宗更用  
輔相復擢靖修及王素為諫官命襄知諫院每上疏  
極言時政會有旱蝗日食地震之變襄謂災異之來  
皆由上下闕失聞者悚然四年進直史閣兼修起居  
注以母老乞知福州改福建路轉運使復占五塘以  
溉民田奏減五代時丁口稅之半復入修起居注御  
史唐介以直言忤旨貶春州別駕襄獨明其忠得改  
英州御史呂景初吳中復馬遵坐論梁適罷臺職襄  
辭不草制後屢有除授非當者輒封還而仁宗遇襄

益厚遷龍圖閣直學士知開封府旋以樞密直學士  
知福州徙知泉州襄再至福州折節下郎士周希孟  
陳烈陳襄鄭穆以風教生徒在泉距州二十里有萬  
安渡絕海而濟襄立石駕渡為梁長三百六十丈種  
蠟於礎以為固又植松數十里以蔭道路至今賴焉  
嘉祐五年召為翰林學士權二司使旋乞外拜端明  
殿學士知杭州卒謚忠惠襄工書為文清道粹美有  
居士集行世孫傳著述頗多歷官南京留守司傅子  
三楠大觀初進士歷官朝奉大夫樞政和間進士歷  
西京提舉主管文字御史常安民在黨籍人多疎之  
樞獨事以師禮提舉湖南學事潭州教授張所白事  
樞問時事如此度今誰可任者所舉劉安世樞瞿然  
曰自崇觀以來禁錮元祐之學子乃敢伸公論若此  
耶即薦所後果知名為殿中侍御史年四十五乞致  
仕懋靖康中任會昌尉視事數月贍賊犯境  
領所部及土兵禦之力戰而死贈承侍郎

方峻

字景通莆田人天聖八年進士試福州左司理請

老分司南京居家聚徒講學初峻官潤州識程琦

及卒琦之子頤為狀其行又托范祖禹為撰神道碑

子士寧字彥昌慶歷六年進士令劍浦蔡襄薦其才

官至都官郎中元宋字道輔元祐六年特科出身官

終威武軍節度推官少與程頤遊頤嘗遺之書期以

精心致志錄經求道朱熹書帖後云伊川先生德威

言重不輕與人接今觀其春春如此則方公之賢可

也知

方嶠

字次山莆田人景祐元年進士初授平陽尉福州

司理參軍歷知循州遷知潮州潮人祀之以配韓

愈累遷屯田都官郎中制置汀漳有巡檢與賊戰死

部卒謀為亂嶠謀知戮首惡三人餘悉奏免終太常

少卿以疾致仕卒子長曰伯騫補侯官尉移建陽丞

部使者行際欲撫令事諷伯騫使言且許薦之謝曰

擠人以自進不敢為也官終知會昌縣次仲宇治平  
四年進士知南安除次叔完元豐中補侯官令官至  
廣東轉運判官次宙熙寧六年進士由東京檢法召  
對除司農寺丞耻為章恭所舉乞外提舉京西常平  
奏給選程頤舊買汝州荒田又以范伯揆唐義問皆  
名臣之後乞加獎擢終河東轉運判官次容字南圭  
皇祐五年進士歷守  
惠州官至朝請大夫

薛利和

字天益興化人寶元元年進士累遷屯田員外  
郎王安石議榷茶欲摧利和提舉廣東茶事利

和作詩謝之曰一路生靈陟頓貧廟堂康濟豈無人  
君侯若問茶租法請把茶租乞與民乃就通判廣州  
卒孫倬字孝廣為太學生心非王氏新經二十餘年  
不肯作進士語金人至生徒解散倬正色言曰諸君  
平時蒙被教育今舍此將安之建炎二年從高  
宗幸維揚自大理丞出知興國軍終朝奉郎

郭琪

字大玉仙遊人慶歷二年進士試秘書省校書郎累官兵部郎中有貴戚曾姓者奪民田歷讞不決

琪判歸民竟被陷死蔡襄哭以詩有如山判筆心常壯為國忠魂勢其驚之句從孫子力字景行開禧初進士授肇慶府教授以薦調惠州校文程江監試欲私所親以賄囑之子力正色却拒其人啣恨置毒酒中子力夜夢神人為滌其腸毒不行官至漳州通判

余象

仙遊人慶歷六年進士官光祿丞首奏王安石議論詭辨名實炫耀雖為一時之文人終為國家之

巨蠹為安石所傾出判宜州又奏安石小人終累大  
事若果大用必至紛更其黨惡之得蔡襄余靖力辯  
獲免仁宗亦知其直歷太常博士英宗即位授屯田  
員外郎謂侍臣曰余象政言朕常畏之卿等宜自謹  
也出判宣州州民至登聞鼓院乞象領州事英宗以  
問司馬光呂公著對曰余象陛下之汲黯真社稷臣

也遂從其請神宗即位除屯田郎中判南劍州遷禮部郎中薦錢藻孫覺錢公輔范純仁後力求致仕嘗著論語集解中庸大義呂公著上其書於朝神宗欲大用之會卒

陳闡

字伯通仙遊人皇祐元年進士知武平縣洞獠久為民患闡立斥堠練丁壯境內晏然辟監建州豐

國監時廖恩嘯聚閩嶺一路騷然安撫司檄闡經畫之復置水倉立鑄港均定八州鹽估在任六年歲課增三十六萬緡後知建州歲饑境內有競糶者令疑為盜以狀白闡曰民饑爭食耳促出粟賑貸眾遂安業調知萊州乞致仕累贈金紫光祿大夫子高元符初進士官太醫學司業累上封事以切直忤蔡京罷歸

方次彭

字公述興化人皇祐元年與弟次臯次夔同領鄉薦次彭第進士歷知望江縣有為盜所殺者

尉捕其鄰鞠之獄且具次彭疑而釋之旬日果獲真盜後知梅州首興學校躬自教導梅人始有登第者秩滿士民留再任六年兩被褒詔元祐初引老歸子醇道知南劍州以清儉自持孫彛紹興十二年特料潮州推官鄭樵稱其文高於天下行高於鄉閭紹興十八年進士知海豐縣歷官俸入悉以調族黨之貧者嘗買婢得少所從師之女育如已出擇名族嫁之

林伸

字伸之莆田人嘉祐二年進士調永靜幕官內侍程昉陳屯田竇邈之策欲塞舊河開蒟蘆於孟家

口滄景德棟四州俱被其害伸條以聞昉銜之謫之新會民有以獲盜功迎合其子者伸之責其子曰朝廷以諸科求賢汝不能讀書應選乃陷我欺君耶尋以朝奉郎致仕

黃隱

字仲光莆田人治平四年進士知無錫燦元豐中召為殿中侍御史剛直敢言時尊王氏學神宗召

問隱以司馬光對不稱旨及問福建鹽茶利條對甚  
悉深見嘉納元祐初為國子司業力排王氏新語取  
三經板火之出知泗州歷監司郡守坐尊司馬氏學  
入元祐黨籍臨終戒家人毋得請廕叙徽宗聞而異  
之與一子官五世孫黼乾道五年進士歷給事中改  
侍御史慶元初韓侂胄攻偽學愈急黼上言治道在  
黜惡任賢使才者不失其職而不才  
者無所憾名入黨禁終權刑部侍郎

朱紱

字君貺仙遊人治平四年進士除王官大小學教  
授尋外補紹聖初被旨召對首陳正心誠意治人  
安民之說歷都官員外郎徽宗即位用藩邸舊臣累  
遷右諫議大夫給事中時范純禮劉安世等屏黜於  
外紱悉為論列出知壽州崇寧元年進寶文閣待制  
真定府路安撫使二年被誣落職提舉杭州洞霄宮  
入元祐黨籍五年起知福州蔡京復相紱遂罷仍提  
舉洞霄宮尋卒初紱在後省凡四月論駁無虛日政



府遣人諭意曰上眷待如此不日當在此地紱不為  
動紹述說興紱移書責京京怒遂喚臺官以與黨人  
王回鄒浩交罪之建炎初贈少保子宗字成德以父  
任授長社尉紹興元年為大理少卿建安盜起除宗  
福建路轉運使宗入對言愚民窮困弄兵將吏養寇  
誅歛益急驅齊民為盜陛下付臣綏集臣可無戰因  
陳便宜十事高宗嘉納之盜平官至右朝散大夫姪  
真秘書丞與紱同入元祐黨籍起知南雄州不赴

傅楫

字元通仙遊人少從陳襄學襄以女妻之登治平  
四年進士調揚州司戶參軍轉福清丞帥曾鞏奇

其才與均禮鞏弟布執政復薦為太常博士時適議  
北郊禮楫援古據今裁車服儀從之數及施行卒如  
楫議鄒浩得罪楫以贖行免官徽宗即位累遷中書  
舍人曾布自以與楫有汲引恩冀為之用楫畧無所  
私徽宗念楫侍講舊人多所延訪楫每以遵祖宗法  
度安靜自然為言居歲餘見時事寔異嘆曰禍其始

此乎遂上疏丐去以龍圖閣待制知亳州卒子諒友  
紹聖元年進士歷知和州謙受以父廕歷夔州轉運

判官俱工詩歌誼夫元符

三年進士官兵部侍郎

### 陳次升

字當時仙遊人初入太學時學官以王安石字

說訓諸生次升誠之坐斥熙寧六年第進士以  
薦為監察御史哲宗立使訪察江湖舉核周輔父子  
經畫江右鹽法害民還言額外上供之數未除異日  
必有非法之歛請自熙寧以後創行封椿名錢悉賜  
豁免又乞定差催及均數之等紹聖初復為御史轉  
殿中論章惇蔡卞植黨為奸乞收還威福之柄時方  
編次元祐章疏毒流縉紳次升言陛下初即位首下  
詔令導人敢諫親政以來又揭勅榜許自新今若考  
一言之失致於譴累非所以示信也初蔡卞以與次  
升同鄉欲使助已故引置憲府次升一無所附且論  
之及其黨周種鄭居中至是卞乘間白帝出為河北

轉運使帝不許更進左司諫時當國者多誣謗宣仁  
太后次升奏事畢宣言曰宣仁保佑聖躬功德巍巍  
若以奸人疵毀輒有議論不惟有虧聖德亦恐大失  
人心哲宗為動容及遣呂升卿往察廣南次升又言  
升卿乃惠卿弟元祐中負罪致任資性慘刻善求人  
過今使按於元祐舊臣遷謫之地逞志釋憾何所不  
至乃止次升復累疏劾章惇皆留中卒為蔡卞所誣  
出知南安軍徽宗立召為侍御史極論惇卞京布之  
惡惇等皆坐竄逐推侍御史又獻言六事多所規切  
尋使契丹曾布進紹述之說徽宗遂決意用京使還  
降充集賢殿修撰旋除名徙建昌編管循州京  
罷復寶文閣待制累官朝散大夫年七十六卒

王回

字景深仙遊人熙寧六年進士調松滋令荆沔俗  
用人祭鬼回至捕治之召為宗正簿充睦親宅講

書與鄒浩友善哲宗立劉賢妃為后勸浩論之及浩  
貶回歛錢為治裝兼慰其母事聞逮獄除名徒步出

都門其子追及問以家事不答徽宗立召還舊官擢監察御史卒蔡京為相列其名於黨籍

陳開

字發明仙遊人熙寧六年進士調密州教授蘇軾深器之入為太學博士召對進兩劄一排新法一

去小人進君子言論激切當國者忌之出為雄州判官終朝奉大夫子騁元符三年登第

陳中復

字從道莆田人與兄純同登熙寧六年進士調懷安尉監建州茶務時朝廷議行權茶令悉陳

利害中復謝曰吾豈以身計為權利作俑者乎遷提舉廣西黔南常平事黔南賊熾中復決戰平之邊吏邀功者奏奪壑境置從允二州中復以為得其人不可教得其地不可守遂罷其議轉廣南東路提舉刑獄事會劉三花嘯聚湖梅循惠皆騷動徽宗手劄委中復規畫不踰月賊平擢中大夫召還卒

陳覺民

字達野仙遊人熙寧九年進士元祐間舉賢良方正時神宗法度紛更人莫敢言覺民力陳役

法則乞復僱役邊事則乞勿棄地言甚剴切遷宗正丞歷知漳建二州移福州以忤安惇罷尋起知泉州有司建言欲權六郡酤覺民陳五不可移書約他郡同論之事遂寢遷本路提刑兼轉運使復知泉州以右文修撰知廣州官至中奉大夫子璘大觀元年賜上舍及第歷官吏部郎中宋輔政和二年進士以論二蔡貶餘杭尉

林豫

字順之仙遊人熙寧九年進士授惠安尉擢為漣水軍使計擒淮南賊紹聖初授內藏副使夏人寇

麟州豫建議謂宜先修葭蘆米脂等寨通廊延路為麟州援四年除河北沿邊安撫使元符三年除知鄜州黃河決移守冀州厚直募少壯築堤民賴以全崇熙二年除知邢州力陳鈔面錢陝西銅錢之弊以忤時宰罷去大觀四年起知邵武軍豫嘗受知於蘇軾蘇轍及軾以作詩譏切時政下獄豫適賜對神宗問

所薦由誰豫以軾對轍貶惠州軾貶雷州豫薦轍詞  
有怒髮衝冠壯心比石之句為章惇所嫉左遷雲騎  
尉後竟坐二蘇薦入元祐黨籍所著有華峰草錄子  
四師說以父廕調嚴州司士歷倅新定有却敵全城  
功師益官統制楊時在講筵奏師益曉達軍政授第  
一正將入援京師行次封邱遇敵至力戰死之師舜  
官至中大夫靖康中盡  
室死難師臯亦死王事

方會

字子元莆田人熙寧九年進士調揚州司法參軍  
以薦移建州教授學政大修朝廷為賜田給廩部

使者上狀詔進秩再任後累遷南浙安撫使上所撰  
水戰法甚悉政和二年召還除給事中終工部侍郎  
累爵文安郡開國侯卒贈太師子  
昭駕部員外郎暄光州司法叅軍

薛奕

字世顯興化人熙寧九年武舉第一同里徐鐸亦  
冠文科神宗賜詩云一方文武魁天下萬里英雄

八穀中投鳳翔府都監遷正將  
元豐中銀川寨之役奕死之

方公袞

字汝補興化人元豐初以布衣召見條奏十事  
曰教胥子舉實才獎清吏摧恬退禁鼓鑄嚴茶

商邨民困寬州縣減丁錢益戶口神宗嘉納命為湖  
州教授尋第進士擢諸王宮教授韓琦嘗語曾公亮  
曰方公袞論事剴切正而不阿  
立已公忠清而不撓豈多得哉

徐確

字居易莆田人元豐五年進士授江陰尉歲潦視  
田以傷告請減租令不悅確曰吾知驗實而已會

蔡京入相與確有舊留置講議司確辭後以宗正丞  
提舉兩浙常平適大水歲饑確考禹貢三江之說請  
自封家渡舊道開洶至大通港達海口役徒頗衆用  
常平錢以充和雇之費水道遂通擢守江州中貴人  
使其舟載花石確曰吾州所有糧舡網  
耳中貴色沮入為刑部員外郎致仕卒

鄭濟

字與梁莆田人元豐五年進士調潮州推官移知端溪縣解有古木為妖濟命工伐之妖遂絕擢考

功員外郎以辭石豫薦不遷者四載政和初出知亳州推行保伍之法道無拾遺召入政提點荆湖南路

刑獄秩滿赴闕慰勞甚厚累官朝請大夫

葉確

仙遊人元豐八年進士時蔡京當國確為內姻未嘗一詣其門後擬除確蘇州欲一見然後上請確

掛冠去官終河北提舉

陳彥恭

字子愿莆田人元祐三年進士調太平州司法推編修以忤蔡京改判保州秩滿復判代羣二

州童貫至羣守帥以下屬橐鞬拜道左彥恭獨朝服揖貫不悅坐罷復除提轄河東鑄錢京以其黨王桓佐之桓欲增監鼓鑄彥恭曰山澤之利不可竭祖宗之額不可踰以此病民吾不忍也桓怒以聞罷歸尋



知壽春會京師告難彥恭讀詔書泣下  
悉旅而西歲餘丐祠避地會稽以老

阮駿

字千里莆田人紹聖元年進士監台州稅方臘犯  
台駿率兵破之建炎初除河南少尹兼西京留守

金人南下駿與孫昭遠率部兵擁護神御殿以餘兵  
再戰不利乃挹神御指敵大罵死之時先後死事者  
有葉居中徐溉居申元符進士判睦州方臘起兵居  
申與力戰死溉字叔清高宗幸維揚金騎侵逼溉以  
國子監丞扈駕  
渡江殞於難

林積仁

字充美莆田人紹聖四年進士歷知甌寧縣三  
歲益戶萬五千餘課最第一徙澠州北海後知

平陽移京畿提點刑獄平陽人皆牽衣泣送靖康初  
父老詣闕乞再任遂以中大夫直秘閣領軍事民皆  
望馬首而拜圖像祀之  
官至廣南東路轉運使

林冲之

字和叔莆田人元符三年進士靖康初以主客郎中副侍郎陳過庭北行被拘屢逼不屈徙顯

州極北洹寒地病革語同難者曰吾年七十有二死何所恨惟國讐未報耳遂南向一慟而絕子郁宣和三年進士福建茶司幹官建州兵變死之從子震崇寧二年進士秘書少監以不附蔡氏有聲震政和五年進士博學精象數嘗上書代冲之北行不報紹興中召為勅令所剛定官震謂秦檜曰公何忍置二帝萬里外博一相公耶即日掛冠去人稱忠義林氏

余祖奘

字景召莆田人元符三年進士通判建州鄉人林孝淵母老遠倅於邠祖奘慨然請易之自邠

移蘭州時建卒葉儂叛祖奘諭以順逆賊遂退以功轉朝散大夫知南恩州召對指陳時弊忤秦檜意遂引疾丐祠歸後擢朝議大夫封開國男

方造

字彥周蒲田人元符三年進士以特奏對策殿廷乞復元祐皇后詞甚剴至又上書論時政闕失崇

寧元年詔籓上書邪人造與馬初陳璣履造廷對策嘆曰是何舉人敢直言如此後璣入對徽宗復誦造

策中語帝謂璣曰卿為朕搜訪其人造竟不肯自達終宣義郎

蔡佃

仙遊人襄孫與弟佃伸入太學俱有聲說三蔡佃崇寧二年進士從祖蔡京當軸欲羅致門下不能

屈會星異上疏論宰相非人宜舉漢汲黯故事以應天變責監温州稅官至朝奉郎佃大觀三年進士官

至徽猷閣待制伸政和五年進士歷判徐楚饒真四州在徐州時禁卒謀亂約夜半舉火佃聞密為之備

仍戒故緩更籌以誤之比火舉則黎明矣叛卒悉就擒在真州值火災仲欲發常平廩賑給守持不可仲

日如得咎請當之事聞朝廷釋不問政歷徐德安和四州初伸與秦檜同舍又同年後以趙鼎黨丐祠者

累橋一日訪仲叙舊好仲不應出為浙東帥司參謀官至左中大夫卒贈特進

陳維剛

字公執興化人崇寧二年進士知項城除燕薊之役與有勞績後提舉禹澧路弓弩手逆賊鍾

相攻辰州維剛率衆鏖戰捕掩無遺官終朝散大夫

林之平

字國衡莆田人崇寧五年進士累遷監察御史建炎初車駕南渡之平由海道赴行在詔募海

舟為備之平厯閩廣募六百餘艘適移蹕永嘉海道支費無闕時朝廷議福建行鈔鹽權酌法之平奏全閩不過數郡乞罷之召赴行在除右司員外郎轉直龍圖閣知温州尋以疾丐祠特授泉州卒於官贈朝

夫請大

林孝淵

莆田人崇寧五年進士厯南劍教授王黼當國以同年欲屈一見曰要職可得也孝淵曰有命

循選格歷判建州改泉州時閩卒多殺守將獨泉卒畏孝淵不敢動弟孝澤宣和六年進士歷知南康軍提舉廣東市舶有番姬持珍異賂禁掖為子求官孝澤曰以一賈婦使朝廷廢二百年成法可乎上書固持不遣除轉運判官知漳州遷提點廣東刑獄力辭除直秘閣予祠年八十餘卒

林宋

卿

字朝彥仙遊人嘗從陳瓘楊時學登崇寧五年進士召試秘書省正字出知恭州時邊臣多以

開疆蒙賞瀘州帥奏於閩溪費州置一州二縣宋卿言漢費地不足耕民不足治徒啓釁端若從其請恐生事邀功者衆徽宗詔罷其役以宋卿兼提舉夔州漳州府路兵馬都監仍知恭州楊時聞之曰宋卿真百鍊鋼也時尚書令夔路欲十萬緡充燕山軍需宋卿言夔門至隘人心易搖事乃已又奏蠲恭民宿逋二十萬八千餘緡米十五萬四千餘石秩滿恭人乞再任徽宗曰是嘗奏罷漢費州役者與之寬朕西顧

憂建炎初以涪守王擇仁薦召赴闕條湖北事宜及兵籌五利等事張浚視師江上辟宣撫判官辭不就丐祠歸終朝請大夫

宋旅

字廷實莆田人大觀三年進士知剡縣方臘之亂旅率民據守盜至躬冒矢石力戰死之

黃宣

莆田人政和二年進士任辟雍博士出知遂平時李彥附蔡京以公田脅制州縣有奸民王時乞籍

遂平租以供延福內藏三奉御劄專委檢按宣屢為執奏至遣中使到縣覈實宣復以身扞之得免後召為太常博士卒

林子立

字伯與興化人政和二年進士知茶陵縣靖康元年募集勤王兵二千人至荆門遇金兵接戰

眾寡不敌中流矢死

宋裴

字材成蒲田人政和五年進士歷金部員外郎紹興中扈從建康請詔中外臣僚博舉勇力權畧之

士以備採擇從之因留總大軍錢糧調度兵食秦檜專政忌裴奉祠者再以薦召為太府少卿充金國迓

送正旦使累遷浙東安撫使以通議大夫致仕卒贈少師

方庭實

字公美莆田人政和五年進士為御史臺檢法時秦檜當國北使來議和庭實以抗疏除監察

御史尋以宗正少卿宣諭三京淮北庭實至京西見先朝陵寢多驚犯秦陵至暴露解衣覆之比還檜預使人誡之曰見上幸無言及他事庭實曰欺君之事吾不忍為及見帝涕泣言之遂求外補除提點福建刑獄首疏請解官以贖胡銓罪檜滋不悅改知泉州尋除廣南東路提刑有挾檜勢為威福者庭實庶得其情案之章再上下乃乞納祿未報卒於官

方軫

字叔時慎言孫以廕補太廟齋郎蔡京復相軫疏列其罪千二百餘言畧云京睥睨社稷內懷不道

上以不孝劫持人主下以訕謗詆誣天下政事不合於天心舉動必欲乎民怨詔以疏示京京請付有司推究於是命御史臺鞠治獄具編管嶺南靖康元年軫請登聞鼓院上書陳訴始得叙終鄞縣令

陳自仁

字克廣興化人宣和六年進士調永豐縣尉時洪吉二州陷隆祐太后護衛兵叛楊世雄梁世

美等犯縣境自仁集尉卒調民兵戮力轉鬪兵疲援絕與知縣趙訓之皆戰死

陳鶴

字聞野莆田人宣和六年進士歷惠州簽判親典故事執經者數百人乃捐鹽倉籬頭錢置學田以

增廩又表置學官轉判廣州值海寇猖獗帥遣鶴督捕襲擒三百餘人官兵貪功請悉誅戮鶴原其脅從

者二百餘人卒於官



葉顓

仙遊人宣和間與弟顥並隸太學顓中武藝謀畧科授承節郎守禦京城敵圍急乃召顥謂曰忠孝

不能兩全吾已受命當登陣死戰以盡臣節爾歸養父母可也相持泣別遂陷陣力戰死顥有傳

陳淬

字君銳莆田人以戰功累遷真定路副總管宣和七年金人入真定淬以孤軍禦之妻孥八人皆遇

害建炎元年辟諸軍統制敗金兵於南華擢知恩州金將王善擁兵十萬來襲淬與長子仲剛拒戰飛必及淬仲剛以身蔽必死之明年淬敗善兵於陳州拜安撫使李成叛詔淬討之三戰三捷屬采石被兵檄淬回援淬欲伏兵以禦杜充不從諸軍潰淬獨戰力盡指天大罵必交於胸神色不動與從子仲敏俱被害

方喜

字良翰莆田人辟燕山工曹掾燕雲陷喜南望隕涕盡取出身文字焚之惟留承奉郎告置衲衣中

夔姓名間道逃歸在燕十九年人比之蘇武特旨轉  
泉州監稅終廣州通判叅政龔茂良贈以詩云八千  
里外望歸雲十九年間送落曠書  
至上林無別語孤臣有死不忘君

許搏

字公執莆田人建炎二年恩賜進士調泉州教授  
以薦召對改秘書省正字累遷監察御史南渡後

歲當科舉以搏多所諳練特遷禮部員外郎  
嘗以事忤秦檜檜得政丐祠以宣教郎終

王晞亮

字季明莆田人紹興元年恩賜進士初秦檜為  
太學正晞亮為學錄及檜當國除勅令所刪定

官龔為已助晞亮守正不阿罷授福州安撫司幹官  
會山寇發帥請晞亮從軍授諸將方畧寇皆束手請  
命以檜宿憾不得美除檜死擢吏部員外郎拜給事  
中嘗舉李寶於偏裨中為水軍統制屢奏奇捷以秘  
閣修撰致仕卒所  
著有過庭遺錄

葉顯

字子昂顯弟紹興二年進士由南海簿累遷司農丞以薦召對除將作監簿出知處州青田令獻羨

錢百萬顯詰令何從得羨命以代本縣民戶輸納夏租厯陞右司諫孝宗即位擢吏部侍郎權尚書論典選一途衣冠之所從出而吏胥得權其柄是使入銓曹與吏為市出銓曹與民為市也乃編上七司條例一書孝宗悅著為令乾道初召對便殿問卿當官何先對曰清廉臣分公忠實要孝宗曰卿無忘此言除端明殿學士拜參知政事兼同知樞密院事武臣梁俊彥請稅沙田蘆塲奏罷之戶部侍郎請兩淮行鐵錢力持不可尋進尚書左僕射兼樞密使引薦汪應辰王十朋陳良翰等十人可備執政禁從臺諫之選又極論龍大淵曾覲竊弄威福二人俱斥去會冬至郊雷雨作孝宗手詔飭大臣顯引漢故事上印綬即日出闕抵家卒贈少師諡正簡

方升之

字德順蒲田人紹興二年進士召對弟豐之贈以詩有流血叩頭期悟主不應回首應江湖之

句升之既至力言和議之非忤秦檜意斥知仁和縣卒

陳吉老

字子州其先許州人宦閩遂家侯官後遷仙遊吉老以父任補官紹興初辟為清流丞贛寇萬

餘侵掠郡境吉老大破之陞本州別駕召除京東提刑收復宿亳徐海四州入對條陳五事除揚州安撫使賜鞍馬御前大刀以寵其行至揚嚴關渡之禁創策應之法大修州城捐俸助費時韓世忠守楚州吉老奏乞來相其役從之不數月事集秦檜當國力主和議吉老累疏爭辨請乞罷檜專責臣以恢復之期御筆褒答未幾卒於官累贈中散大夫子希造字賢命其牧馬希造棄間擇所調御良馬疾馳歸父奇之調揚州錄參紹興初侍父臨汀每戰必前屢奏凱捷

武平之役乘勝深入歿於又竿口吉老曰南八男兒  
古人所慕人患死不得所耳吾兒今又奚悲朝廷嘉

其忠節累贈

奉直大夫

丘真

字明遠仙遊人紹興初舉遺逸上恢復良策數萬  
言呂頤浩乞留軍中以布衣入幕有功奏授迪功

郎張浚辟充都督府管田幹官改三京宣諭司幹官  
王威作亂真單騎諭降之嘗與荆南帥劉錡論兵錡  
大悅服沅州解降囚四十餘人衆謂宜殺真獨論釋  
錡曰叅議當於古人中求之後因言事忤權臣出守  
真州卒累  
贈中大夫

陳俊卿

字應求莆田人紹興八年進士累官殿中侍御  
史湯思退專政首疏罷之復為張浚辨讒有旨

移浚守建康內侍張去為陰阻用兵且陳避敵計以  
搖成算俊卿請按軍法高宗稱為仁者之勇除權兵

部侍郎受詔整浙西水軍李寶因之遂有膠西之捷  
孝宗受禪有志恢復屬張浚闖外事以俊卿沈靜有  
謀命為中書舍人充江淮宣撫判官會和議方堅召  
還除禮部侍郎初浚謀大舉北伐俊卿以為未可已  
而邵宏淵兵潰思退議罷浚都督俊卿奏復之因為  
思退所擠請祠提舉太平興國宮思退既竄太學諸  
生伏闕下乞召還俊卿乾道元年入對極論朋黨之  
弊除吏部侍郎同修國史錢端禮起戚里為叅政窺  
相位俊卿進讀寶訓因言本朝家法外戚不宜預政  
端禮叩之尋出知建寧逾年擢吏部尚書拜同知樞  
密院事而奏曾覲龍大淵怙恩竊柄孝宗為出二人  
中外稱快遂以俊卿叅知政事先是禁中密旨直下  
諸軍宰相多不預聞俊卿奏自今百司承御筆處分  
事須奏審方行從之樞副劉珙進對忤旨詔降奉祠  
俊卿奏請留乃命珙帥江西四年授尚書右僕射同  
門下平章事兼樞密使時虞允文宣撫四川俊卿薦

其才堪大用孝宗即召允文以為右相既而帝意頗  
向允文俊卿亦數求去遂以觀文殿學士知福州淳  
熙二年起判建康兼江東安撫赴闕從容為孝宗言  
朝士奔走權門公然趨附無復顧忌廉恥道喪後以  
少師魏國公致仕卒諡正獻有集二十卷俊卿生平  
雅善朱熹屢嘗論薦其卒也熹不達千里往哭之又  
狀其行子守定必俱從熹受學焉守字師中以廢歷  
工部員外凡六受郡符三持使節以廉介稱定字師  
德蚤穎異熹告以聖賢之學必自近而易者  
始遂反而求之以父廢任右承奉郎必有傳

**龔茂良**

字實之莆田人紹興八年進士調南安簿歷邵  
武法曹以廉勤稱累遷吏部郎論景德靖康禦

敵得失除監察御史奉詔陳時政闕失首論曾覲龍  
大淵怙惡擅權狀遷右正言內侍李珂死贈節度諡  
靖恭茂良諫曰中興名相趙鼎勲臣韓世忠皆未有  
諡今施於珂為可惜事遂寢除直秘閣知建寧府自

以不為羣小所容請祠不允起廣東提刑尋知龍興府江西連歲大旱茂良至講求荒政全活數多待制數文閣除禮部侍郎拜叅知政事淮南旱茂良奏取封椿米十四萬賑之葉衡罷詔命茂良以首叅行中書省事茂良請召用朱熹除秘書郎羣邪讒之熹不至錢良臣侵盜大軍錢糧累十數萬茂良發其事俄召良臣赴闕與史浩俱柄用茂良乃以疾求去後疏言恢復六事孝宗不悅曾觀謝廓然遂乘間論劾謫安置英州卒於貶所觀與廓然死茂良

家投匭訟寃復資政殿學士謚莊敏

黃公度

字帥憲莆田人紹興八年賜進士第一除秘書省正字時秦檜當國公度坐與趙鼎往來又貽

書臺諫譏切時政檜叩之判肇慶府檜死召還高宗詢嶺外弊事公度曰廣東小郡有十年不除守臣者權官苟且郡政廢弛弊莫踰此高宗曰卿在吏部當無此弊遂以為考功員外郎終朝請郎累贈正奉大



夫著有知稼  
集二十卷

宋藻

字去華莆田人紹興初試禮部進中興十君論高宗謂其所陳可採以布衣召見授廬陵尉八年第

進士累遷江南西路轉運金人渝盟朝廷分遣七戌以藻充湖北京西招討司機宜與主帥指畫形勢敵不敢窺漢上摧知江陰軍孝宗立除提舉浙東常平茶鹽事察猾胥六百餘人罷之永嘉有風濤之變藻被旨賑卹發粟寬租捐竹木之稅以予民坐彈劾温州守臣為權貴所擠力丐休致卒贈大中大夫

方翥

字次雲莆田人六歲而孤從兄畧作萬卷樓儲書千二百筭語翥曰以汝姿性不出戶十年可移書

入肝膈矣紹興八年登進士調閩清尉之官未一載歸闔戶十八年盡讀其書有旨召對除秘書省正字以風聞論事外補卒於家初翥與林光朝俱在錢塘光朝喜李白石曼卿之為人翥曰此數人來孔門恐

一日着脚不得光朝愧悟  
以翥為先聞道兄事焉

陳光祖

字世德希造子以父死事補官知英德府奏蠲

上供泛輸以寬民力政知邕州州歲市峒蠻馬  
絡邊有奉議坊峒蠻預為措辦而官擅移其利於他  
峒遂開釐端互市不通光祖以恩信招徠之馬至溫  
數峒酋李萬久為邊患光祖計擒之諸峒惕息除廣  
東提刑作欽恤編以戒僚屬新瀆溪祠以崇道學罷  
一切無名之征官至朝奉郎子沂字伯深以廕補新  
州推官師事陳淳又受易於蔡淵蔡沈喪祭一遵朱  
熹家禮陳淳名  
其室曰貫齋

郭峒

仙遊人紹興十二年進士初調廣州司戶禦賊戰  
死同邑有邱杞者知真州紹興間與鄉人為忠義

社以自固與山寇  
力戰亦死於陣

王悅字習之莆田人紹興十二年進士孝宗即位召見  
極論和議之非稱旨除國子監丞兼權吏部郎出

知衢州卒贈  
直龍圖閣

鄭耕老

字毅叔莆田人父安正築書堂率子弟講學其  
中一時名士多從之遊耕老登紹興十五年進

士歷明州教授後以經術薦召見奏引太祖問趙普  
天下何物最大曰道理最大如知道理為大則必不  
以私意而失公忠孝宗悅親擢國子主簿添差福建  
安撫司機宜文字秩滿歸南陂讀詩易中庸洪範語  
孟皆有訓釋  
卒年六十五

鄭樵

字漁仲興化人父國器太學生歿於姑蘇樵時年  
十六徒步護喪歸葬乃築草堂夾漆山以居搜奇

訪古遇藏書家必借留讀盡乃已專以討論著述為  
事一時名人若李綱趙鼎張浚輩咸器重之自經義

禮樂文字天文地理下逮昆蟲草木之類皆有論辨  
紹興十九年上之詔藏秘府復還艸堂部使者三舉  
孝廉而舉遺逸皆不就紹興二十七年以薦召對奏  
言臣處山林三十年修書五十種皆已成其未成者  
臣取歷代之籍始自三皇終於五季通為一書名曰  
通志參司馬之體而異司馬遷之法謹摭其要覽十  
二篇曰修史大例先上之帝曰聞卿名久矣數陳古  
學自成一家何相見之晚耶授右迪功郎力辭還山  
閱四年通志成詣闕上之以為樞密院編修官所著  
書凡五十八部惟通志最行世學者稱夾漈先生

陳居仁

字安行莆田人紹興二十一年進士充檢討官  
淮甸用兵魏杞以宗正使北辟居仁幕下時人

情洵懼居仁上馬從容舉酒屬杞曰天寒且晦此庖  
觀者壯之虞允文與論兵謝不能退而貽書謂有定  
力乃可立事若徒為大言終必無成事成亦旋敗允  
文為之動色嘗轉對言立國須定規模陛下非無可

致之資而規模未立又論人君不可事末節而忘大體累遷禮部郎請外知徽州秩滿入對因言歸正諸人過於優渥而戰士出萬死策勲廉給反薄至丐於市乞如周卹以全始終念功之意帝嘉納會樞屬闕員帝曰才如居仁豈可久為郎即授樞密院檢詳文字權直學士院尋知鄂州移建寧府鎮江大旱又移守鎮江糴運荆楚間商人知為居仁爭以粟就糴存活數萬計加寶文閣待制知福州再進華文閣直學士卒有奏議制

藁詩文行世

林杓

字子方莆田人紹興二十一年進士召對首言持

臣似無用而大節不可及又言兵強財豐未足恃所恃在得人心得人心又在修德除秘書正字遷校書郎知信州陞辭言事剴切至郡裁驕兵以法出公帑代輸物力錢尋提舉廣東常平鹽茶移使江西發漕

司緝錢三萬六千助諸縣歲計會泉州缺守遂以授  
析累年積案剖決無留舉行荒政活民甚多徵為吏

部侍郎改  
知福州卒

劉夙

字賓之莆田人與弟朔師事林光朝登紹興二十  
一年進士除著作郎上封事首論馳射近侍備淮

三事又奉詔陳得失疏言嚴法守裁僥倖當自宮掖  
始兼論黃門濫格宰相臺諫不振及謹邊防辨才德  
數事出為湖北安撫司叅議官乾道三年差知衡州  
轉奉議郎奏請舒民力罷貢獻辨君子小人曾覲為  
賀金正旦副使道衢謁夙不納明年徙知温州引疾  
歸卒子二彌正淳熙八年進士嘗為朱子定謚曰文  
韓侂胄將啓費使彌正如兩淮還言無故先發不順  
無豫輕舉不可侂胄怒官終吏部侍郎彌邵析心學  
古自六經以下皆手抄纂考論古今斷制義理一以  
洙泗闢洛為法郡守楊棟創尊德堂以處之復為於

朝未報卒年八十二  
著有易纂漢考等書

姚宗之

字元仲興化人紹興二十七年進士授吉州司戶參軍遷太常博士進將作少監輪對上言時

事高宗稱善左司張棫嘉其議論有古諍臣風以親老求外提舉福建路常平茶事政浙東承詔覈實常平米因言平糶廣儲所以賑貧乏救水旱而追呼筮楚嗟怨之聲上干和氣願以新易陳每歲兌易支遣庶幾實數常存以為荒政之備詔從其議移江南西路提點刑獄復請祠便養以憂歸

劉朔

字復之夙弟紹興三十年試禮部第一廷試甲科調温州司戶叅軍屬歲饑疫火焚千餘家郡守以

朔董其事朔以藥囊粥釜自隨活數萬人孝宗初召對首請延納敢言之士聽受難堪之言以自考成敗得失且及曾覲龍大淵罪狀改宣議郎知福清縣請祠歸再召入對時虞允文贊孝宗恢復士多嚮之朔

極諫以為宜選兵將廣儲峙從容以待其變不可憑  
虛蹈空決天下於一擲除秘書省正字以疾丐外除

福建安撫

司叅議卒

薛元鼎

字叔雲興化人紹興三十年進士歷權戶部左  
曹郎官輪對進陳民事利害孝宗嘉之遷秘書

丞兼太子侍講除提舉浙西路被旨相視太湖奏開  
運河五十四里公私稱便授戶部左曹郎官時部長

有獻貢籍之說者元鼎奉命往秀州議以一州歲計  
綜覈羸縮為天下準平孝宗可其請進吏部尚書兼

太子諭德以  
母喪歸卒

傅淇

字元瞻仙遊人紹興三十年進士歷監察御史孝  
宗有迅掃河洛之志特獎武臣倖進者多以文階

易武爵淇疏論之遷太府少卿輪對勸帝擇端愿誠  
慤之士以備官僚又言川廣去朝廷遠守臣不可輕



昇皆見嘉納除宗正少卿使北還具言河北河南情形甚悉孝宗稱是久之歷浙東西提刑改知寧波府以母老便養知泉州光宗立起廣西提刑復知温州卒贈中奉大夫開國男

傅汶

字元魯仙遊人歷知將樂縣劍俗生子多不舉汶令里正籍記家給錢米活者數萬尋倅廣州三日

內分別三獄淹囚引鞠得情決配有差帥司馬役奇之薦知貴州郡僚月俸積壓汶至撥錢還之張斌為帥聞而賢之曰祇此一節便見施為除提舉江西茶鹽事繼知德慶府所至以仁政稱

陳大亨

字文通仙遊人紹興三十年進士歷官五任貧無居屋惟寓僧舍官至泉州通判

林光朝

字謙之莆田人間吳中陸子正受學於尹焞往從之專心踐履不為訓詁生平未嘗著書有得

處惟口授學者使之心通而已登隆興元年進士乾道間龍大淵曾覲以潛邸恩倖進光朝召對頗及二

人罪改左承奉郎知永福縣後以薦召試館職歷國子司業出為廣西提刑移廣東討平嶺南茶寇孝宗聞之喜曰儒生乃知兵耶召為國子祭酒命講中庸稱善除中書舍人謝廓然由曾覲薦賜同進士出身除殿中侍御史命從中出光朝愕然曰是輕臺諫而羞科目也立封還詞頭呂祖謙喜曰此舉過江後未有也後引疾提舉興國宮卒年六十五謚文節有集二十卷學者稱艾軒先生朱熹嘗言某少年過莆見林謙之方次雲談道精細今二公已死更無一人能繼之者及門邑人黃芻字季野官懷安丞志行高古劉夙兄弟而下皆推讓焉陳士楚字英仲乾道八年進士以國子監簿召對紹熙初直經筵講周書無逸篇引力田除莠以喻小人有妨君子孝宗傳語曰陳直講議論精詳理致深奧誠得師儒之道除右侍郎林希逸守莆祠光朝於穀城山以士楚侑饗焉

方大壯

字履之莆田人專心求道不事場屋朱熹至莆舉所學就正自號履齋執父喪三年不出戶兄

子符字子約亦受學於朱熹慶元己未進士歷潤衡二州教授知瀏陽縣通判徽州

方崧卿

字季申莆田人隆興元年進士知南安軍移吉州罷米運力勝錢歲萬餘緡減放諸邑月斛錢

六萬八千緡除廣西轉運判官奏罷歲解鄂靖錢十一萬緡採訪鹽課利害編為書十二條上之徙京西

轉運判官卒崧卿家藏書四萬卷手自校讐纂韓詩編年十五卷

翁點

字沂伯莆田人乾道二年進士歷湖南轉運判官提點江東刑獄時常平使者行役法病民點移書

止之開禧初有旨召赴行在御史徐柎劾點寢召命柎韓侂胄黨也點上章自辨謂柎私託不行所以貽怒且侍郎楊輔秘書劉起晦皆今之望為國家元氣柎并欲論罷兩人中外不無失望侂胄見其章大怒

並送三人新州安置  
點卒於貶所

**方耒**

字耕道莆田人少孤苦學師事朱熹乾道二年登第調善化尉復謁張栻栻深器之謂可與共死生

同禍福者耒一人耳後栻帥荆南辟耒及游九言為屬曰是二人者能攻吾過失耒感激知已遇事無隱

改知連江卒弟耒

士皆遊朱熹門

**鄭僑**

字惠叔興化人乾道五年進士第一嘗以左氏春秋侍講東宮李季於父子君臣君子小人之際淳

熙八年淮浙歲凶孝宗以常平多不得人擇僑為之淮鹽賦入甲天下積久逋多僑振綱剗蠹宿弊一清又濬治漕渠五百餘里入為禮部郎中高宗崩孝宗欲行終喪之制僑叅稽古今以求至當條起居舍人轉左庶子無給事中婉容陳氏父以墨詔補官僑封還之命遂寢殿前指揮郭棟以交通殖貨僑論格其

秩遷中書舍人六押制勅悉出僑手差充金國賀正使會金主寢疾趣就東上閣門進書僑不可捧書屹立徐曰東上閣門臣僚上章之所某奉皇帝命乃於此地辱命之罪死不足贖自朝爭至曰昃金知不可屈乃遣回光宗受禪命為吏部尚書兼侍讀每以畏天進德孝敬問學親君子遠小人廣言路惜名器為言寧宗即位拜叅知政事進知樞密院事上章求退以觀文殿學士致仕卒贈太師謚忠惠子寅字子敬以父任補官厯知吉州召對言濟邸立廟且言三邊無端平初遷左司郎中又請為濟邸立廟且言三邊無備宿患未除宜正綱紀抑僥倖汰冗兵以張國勢後以執法守正出知漳州卒於官

**黃艾**

字伯蒼莆田人乾道八年廷對第二累擢清要朱熹知漳州奏行經界朝議未定艾輪對言以天下

之大公卿百官之衆議一經界三年不成使更有大於此將若之何光宗乃詔行之寧宗即位為右正言

兼侍講會朱熹罷講筵父因進講問逐熹何驟寧宗  
曰始除熹經筵耳熹乃過事輒言父懇請再三不聽  
除中書舍人改刑  
部侍郎以待制終

朱泳

字子游仙遊人乾道八年進士調連江尉以捕盜  
功擢知海陽除福建運管董試漕闡當路鬻私其

子正色拒之卒於官從子首諒以特科調龍巖縣簿  
汀寇作長官巡尉棄賒去追捕使陳解嘉首諒獨守  
職以縣事委之首諒身率士卒督賊賊悉  
就擒鞫上其績首諒無意禁進丐祠歸

余崇龜

字景望仙遊人淳熙五年與兄元一同登進士  
魁官司農丞賜對便殿除秘書丞韓侂胄欲邀

一見處以要津崇龜不從力乞補外知江州侂胄敗  
即日除監察御史奏言名器冗濫之弊士大夫卑陋  
之習言甚切直嘉定改元金人議和求函侂胄首廷  
臣議欲予之崇龜謂侂胄誠有罪函首送敵辱國矣

遂不預議尋除兵部侍郎兼權給事中卒元一字景  
思淳熙五年進士乙科娶黃幹女弟因從朱熹遊歷

官池州通判子

日華見文苑

傅誠

字至叔仙遊人嘗從朱熹遊登淳熙八年進士初  
調永春尉力辯陳介珪之寃與上官忤納告勅求

去介珪卒得白遷太常博士真德秀時為正字每過  
從談論古今事移晷方去寧宗朝輪對言極鯁切以

哭子彥卿  
傷性而卒

傅大聲

字仲廣誠從子淳熙十四年進士授福清簿奉  
檄鞠長溪囚釋株連五十餘人為帥辛棄疾所

重調貴州教官課最天下第一改知武平縣遷判循  
州適冠發守稱疾大聲調兵力戰賊潰去未幾復倡  
擬諸司專委大聲督捕乃上禦賊數策漕使劉強學  
頌行之薦大聲知州事秩滿乞官觀官至朝奉大夫

方士

字若水，未第。淳熙中，游太學，揭朱熹以靜退之說為請。十四年，擢第。除長泰主簿，會朱熹守漳，請壬

主學事。士條上講說課試差補等十事。熹令屬邑皆做之。龍巖有卒殺人獄，吏逼同行者誣伏。漳浦有僧罷於佃而勒者，皆曰飲鳩。士承檄往，悉閱實，抵罪熹稱其能，秩滿除知寧鄉縣，未上卒。

宋鈞

字茂洪，莆田人。紹熙四年進士。歷知嚴州，首疏乞蠲淳安經制錢五千緡，及他邑無名征，欲累遷左

曹郎官，總領淮東軍馬錢糧。光州報警，鈞上言：進討重賞以招降，附清野以待饑，勞又請別造防江輕艦數百艘，以備策應。多見採納。遷司農少卿，後再知泉州。講荒政，斟酌便宜，所活萬計。復除海苔蠲房葵菜等稅，捐俸代輸畸零之戶民畫像以祀官，終秘書閣修撰。

方士繇

字伯謨，莆田人。蚤孤，徙崇安。從朱熹遊，以學古為事，稱朱門高第。紹熙間，熹門人有至行在者。



公卿爭延致恐後士繇聞之曰異  
時必為學者禍未幾學禁果作

黃士毅

字子洪自莆徙吳不忘故鄉因號壺山慶元附  
詆排道學士毅徒步歸闈師朱熹熹命日觀一

書夜叩所見居數月授以大學章句終身從事於斯  
嘗類注儀禮誤次朱熹書說及文集語錄若干卷

陳諒

字友仲仙遊人以父豐廢官永春尉歷知古田縣  
鮮歸帑藏無餘司計沮之朱熹為言於帥曰陳宰

蕪吏也若以此逗遛何以為善者勸遷通判循州  
改知潯州郡向無貢院士冒江灘之險附試於藤諒  
至為申省部立院潯士德之帥李

大異嘉其能辟知象州卒於官

鄭勳

字景周仙遊人嘉泰二年進士知博羅縣戍卒亂  
焚掠州境直抵其邑或勸之避勳曰吾去如百姓

何正衣冠坐以待之賊迫以白必勳不為動  
正色叱之遂被害事聞贈朝奉郎官一子

丁伯桂

字元暉莆田人嘉泰二年進士由樞密院編修官累遷吏部侍郎兼給事中在言路二年諫疏

盈篋皆切中時弊嘗言陛下始好賢受諫近者言官忤旨至形詞色疏多留中易置臺諫如奕棋然此闕失之大者又言加恩后戚及美人親屬之非未幾卒贈通議大夫

方信孺

字孚若崧鄉子以歷補番禺尉韓侂胄謀恢復邊釁不已朝廷尋悔金亦厭兵時方議和信孺

以薦為樞密院叅謀官使金至濠州金帥止之要以五事信孺曰反俘歸幣可也縛送首謀於古無之稱藩割地則非臣子所忍言至汴見金左丞相都元帥完顏宗浩反覆辯折不少屈自春至秋三往返還言敵所欲者五事割兩淮一增歲幣二犒軍三索歸正等人四其五不敢言侂胄再三問至厲聲詰之徐曰欲得太師頭耳侂胄大怒奪三秩臨江軍居住已而王柟出使定和議增幣函首皆信孺所持不可者柟

歸具言金人每問信孺安在乃起通判肇慶府峒寇竊發被旨同廖德明措置收捕就命知韶州擒赤水峒賊殘之尋提點廣東刑獄奏縱不決之獄數千人遷淮東轉運判官知真州即北山櫃水築石堤袤二十里人莫知其所為後金兵薄儀真守將決水櫃以卻敵城賴以全山東初內附信孺請遜威望重臣將精兵數萬往開幕以主制客以重馭輕可以固江北瞰兩河坐責降三秩再奉祠卒

# 方大琮

字德潤莆田人開禧元年省試第三人除右正言疏論天下大勢入對復言理亂安危自君心

始格其非者在大臣救其源者在諫臣又以女寵侈費為戒遷起居舍人兼實錄院檢討官奏乞還魏了翁以重朝廷累上諫言為侍御史蔣峴所中予祠尋改集英殿修撰知廣州調知隆興卒諡忠惠有奏議外制雜著若干卷子演豫字景行嘗攝邵武軍增郡帑儲二十倍創學田百餘畝蕪湖師潰國事幾殆

演孫時家居猶運米以助京師  
集民兵以固鄉井官終大司農

王太冲

字元籛莆田人嘉定元年登第知吉水縣值兵  
饑按產數羅官不抑價而巨室樂從推知梅州

改太宗正丞輪對請以太平責宰相以謙言責臺諫  
以富强責主兵財者除考功郎中以郎班對言括田  
權使興利非便兼禮部郎中除知汀州卒太  
冲少善聲律多通古書有奏議集若干卷

鄭可學

字子上莆田人由鄉薦道武夷從朱熹學自以  
稟性褊急而於懲忿工夫尤力後熹知漳州賓

禮可學以教子弟晚年刪定大學一編曰此書欲付  
得人惟子上足以當之凡四方學者疑問輒令質之  
士大夫之南者必見可學而後行前後三奉大  
對嘉定四年始授忠州文學卒著有春秋博義

陳宓

字師復後鄉子登朱熹門與黃幹遊以父任歷南  
安鹽稅知安溪縣嘉定七年入監進奏院上封事

慷慨盡言遷軍器監簿九年轉對言人主之心貴乎明大臣之心貴乎公臺諫之言貴乎直出知南康軍歲大侵奏蠲其賦十之九修白鹿洞與諸生討論改知南劍州會旱疫復奏蠲逋賦十數萬弛新輸三之一持錢粟藥餌躬率僚吏戶給之創延平書院改知漳州致仕以直秘閣主管崇禧觀卒贈直龍圖閣著有論語註義問答等書并文集若干卷

王邁

字實之仙遊人嘉定十年進士授潭州觀察推官移浙西安撫司幹官調教授俄召試學士院因策

楮幣論及時事言君子之類雖進而其道未行小人之迹雖屏而其心未服真德秀聞而善之喬行簡再相或傳史嵩之復用邁上封事論之理宗為改容復因裡祀雷雨求言抗疏極論於事羣小劾邁交結真德秀魏了翁以收虛譽削二秩淳祐改元通判吉州右正言江萬里疏謂邁才可惜不即召將有老不及

用之嘆理宗以為然有尼之者遂止知邵武軍應詔驛奏七事為焦炳炎論罷予祠卒贈司農少卿

**陳煒**

字光仲莆田人嘉定十三年進士淳祐中為監察御史首論執政非人有令換疏者煒答以頭可斷

疏不可換除太府少卿不拜而行復召奏事力辭終廣東轉運判官

**徐千能**

莆田人紹定間興寧主簿任未及月強賊陳三鎗羅動天逼境千能與令顏公袞往諭不聽為

所執遂與公袞厲聲罵賊賊并執其長子及二僕皆殺之次子萬金僅得免

**葉大有**

字謙夫仙遊人紹定初以春秋應鄉試省試皆第一授英德府教授秩滿除國子學錄輪對指

陳國計為理宗所知歷著作郎除右正言疏論儲嗣紀綱人材為國家命脉遷左司諫奏抑內降保直臣

罷外戚授官遷殿中侍御史奏惜名器惜民命惜財力惜天時四事轉侍御史獻備邊三事薦浙東憲臣

蔡抗可大任遷右諫議大夫除刑部尚書以母病力辭理宗累劄褒留以寶章閣知温州母疾哀毀而卒

卓得慶

字善夫莆田人紹定五年進士歷著作郎以忤賈似道出知漳州景炎二年除戶部尚書兼福

建制置司叅謀官元兵逼城得慶與家人訣入家廟將自殺俄為甲士所執與二子規權俱被害人擬之

下壺父子云

黃績

字德遠莆田人聞陳宓潘柄從黃幹得朱熹學遂師事之同志十餘人旬日會講及宓柄卒績築東

湖書堂請田於官春秋祀焉晚聞趙以夫作易通與之上下其論以夫稱為益友著有四書遺說等書子仲元字善甫少立志讀濂洛關閩書嘗摻次唐宋名人文二百四十二家文學為時推重咸淳七年第進士歷國子監簿宋亡更名曰淵有四書講稿文集若干卷

謝升賢

字景芳仙遊人端平二年進士調滄光尉漕帥方大踪檄為瀛泉書院長提刑揚大異又檄為

相江書院長皆薦之於朝乞充師儒之選官終興寧令所著有太極西銘說易通學庸語孟解

吳叔告

字君謀莆田人端平二年進士第一累遷秘書郎輪對首言敵人未來交口談清野之效裸享

偶霽動色稱格天之祥大臣百執事循默容身者多慷慨許國者少又言斜封曲徑借曰御筆奏篇束閣

報曰旨依室垂罄而襲承平之用度家四海而事藩

邨之繕營皆切時政為官府所嫉景定二年召除右

郎官入對言湖廣淮蜀四面皆敵今瀘城歸連海復

山東版圖再入職方儆戒之意不宜少怠尋除大理

寺少卿

丐外卒

林彬之

字元質莆田人端平二年進士擢監察御史首疏天命人才民心次言括田之害會天變復疏



陳科抑權法括田三宮扶陰抑陽三事請建國本論  
罷史嵩之為相除殿中侍御史兼侍講每緣經義規  
切君德景定三年  
除寶章閣待制卒

李丑父

字良翁莆田人端平二年進士除太學博士遷  
諸王宮教授丁大全當軸丑父忤其意遂罷子

祠俄以太府丞遷著作郎權禮部郎踰月班對草兩  
疏首言苛征戚畹黷貨聽說四事次言競侈二習皆  
切時弊請外提舉湖南常平義倉桂陽有王媪者家  
八口為龔豪所殺丑父直其寃西全寶慶二守貪墨  
擬疏論之坐

為所中罷

方蒙仲

名澄孫以字行莆田人淳祐七年廷對萬言大  
約欲聚君子以續國氣脉明公論以強國精神

又請立涪陵後銅秦檜子孫竄史嵩之以謝天下權  
甲科為邵武軍教授尋以淮西制置司叅議知邵武

軍請立樵川書院以廣教養召為秘書丞卒初蒙仲以文見知賈似道及似道相力求補外子公權字立道咸淳四年登第歷太常寺主簿有氣節人稱石巖先生

薛季良

字傳叟興化人以世廕補廣州左司理權鋒軍叛季良招諭之事平召赴都堂審察輪對乞修

實德實政以回天意除檢登聞鼓院奏言檢院乃肺石路鼓遺意几進狀宜索案予決虛者反坐從之遷司農丞丐外知潮州以廉儉節縮為事鹽使疑潮鹽有遺利欲增筴季良抗論寢其議嘗自扁其居曰廉村所著有千林漫稿

陳文龍

字君貴莆田人俊卿五世從孫咸淳四年廷對第一賈似道愛其文禮重之由鎮東節度判官

歷監察御史先是臺中有建白皆呈藁似道文龍獨否似道不悅出知臨安府襄陽圍急似道陽請督師

無行意而陰使其黨留已襄陽遂陷文龍疏論其罪  
范文虎總帥無功似道庇之出知安慶又除趙潛知  
建康黃萬石知臨安文龍言文虎當罰而賞潛乳臭  
子萬石怠荒皆不勝任似道怒黜知撫州旋使臺臣  
李可劾罷之未幾元兵東下文虎首迎降似道兵潰  
魯巷潛最先遁度宗始悔不用文龍言起為左司諫  
遷侍御史時邊事急王爚與陳宜中不能畫一籌而  
日爭私意文龍疏曰書稱三后協心同底於道北兵  
今日取某城明日築某壘而我以文相遜以迹相疑  
譬猶極溺殺焚而徐行安步也請召大臣同心圖治  
無騰虛說宜中與爚卒不相能去累遷文龍叅知政  
事而元兵已至杭北關外衆議降文龍乃上章乞歸  
養既復求還不報德祐丙子孟王即位福州復以文  
龍叅知政事漳州叛文龍辟前守黃恮招撫興化石  
手軍亂文龍復討平之十一月元將董文炳阿剌罕  
兵至福州孟王趨廣文龍以前官充閩廣宣撫大使

彈家財募兵萬人即興化軍開閩已而降將王世強  
導元兵入廣建寧泉福皆降知福州王剛中遣使徇  
興化文龍斬之縱其副持書還責世強剛中負國遂  
發民兵自守元人來攻不克使其姻戚持書招諭文  
龍焚書斬使遣將林華偵伺境上華亦降元導兵至  
城下通判曹澄孫開門降執文龍與其家人至文炳  
軍中不屈左右凌挫之文龍指其腹曰此皆節義文  
章也可相逼耶引就館元帥索多往來諭意且以母  
老子幼感動之文龍曰我家世受國恩萬無降理母  
老且死先皇三子岐分南北我子何足關念情詞慷  
慨索多愀然改容乃械送杭州文龍去興化即不食  
至杭餓死其母病繫福州尼寺中左右視之泣下母  
曰吾與吾兒同死又何恨哉亦死計聞詔益忠肅賜  
廟號昭忠元至正間遣使李文虎至郡訪求陳文龍  
子孫將錄用  
無一應者

陳瓚

字慧玉俊卿曾孫文龍從叔也少有大節知天下必亂無意仕進散粟出帛以濟饑寒曰吾世受國

恩當為國收人心耳賈似道潰師蕪湖文龍起叅知政事瓚語之曰今天下已危列郡團兵自守坐而待盡莫若勸上悉召四方兵屯聚沿江要害擇賢王與文武才幹臣分督之敵若來戰併力齊奮猶可為也文龍撫然曰叔父策甚善柄國非人恐不能用是行也某必死之德祐丙子端宗趨廣瓚出家財三百萬緡航海助張世傑世傑欲授以官瓚曰某激忠義而來豈買爵耶辭歸十二月叛將林華陳淵與通叛曹登孫以城降元文龍被執北去瓚曰姪不負國吾不負姪即陰部署賓客募丁壯景炎二年二月晦攻林華等誅之復興化軍以華首告祖廟遂獻於朝端宗嘉其忠義命以通判權守興化且令乘勝與世傑犄角復福泉二郡九月元索多來攻興化瓚號令嚴整每巡城必南面號慟士皆感奮逾月元兵蟻附登城瓚

力不支尚率家僮及義勇五百人巷戰元兵死者千餘璫被執索多欲降之大罵不屈索多怒車裂於五門以殉屠城三時血流有聲事聞贈兵部侍郎謚忠武子若水世傑辟為督府架閣

# 元

## 林以順

字子木莆田人至治辛酉進士歷慶元縣尹有弟殺兄陰以賂免以順發其獄誅之移浦江縣

平反冤獄新作文廟改台州路推官總管焦鼎建招安海寇之議以順慮以姑息亂天下力阻之不從後果如其言陞江西儒學提舉改知福清州時豪強橫起海港中劫殺尤多以順以次捕除尋除同知福州路總管府事致仕

# 明

方徽

字可久莆田人洪武癸丑進士授給事中兼齊王府錄事改監察御史陞懷慶知府時星變求言徽

首言風憲以激濁揚清為職今乃計其事蹟多寡定為優劣以故不聞旌拔廉能而專務羅織人罪多徵贓罰此大患也又言朝廷賞罰明信乃勸懲之道去年各行省以用空印坐罪而河南叅政安然山東叅政朱芾俱有空印皆無恙反得陞擢無以示勸懲忤旨降沁陽驛丞十三年以事逮至京卒年三十二

陳觀

字廷賓莆田人元季韜晦不仕與鄉人方樸等二十二人為壺山文會明初詔舉遺逸授本府訓導

洪武十四年寧國簿林一初薦觀被命至京朝謁試王猛捫蝨論稱旨擢陝西右叅政居二年忽馳符召之比至則曰按察司有短爾才者可就儀禮司供事肆禮已復召侍左右尚膳至哺乃出嘗應制拱鍾山說立就甚蒙眷賚以祖母喪歸兒孫從容問陝西金礦何狀觀驚曰吾侍罪落僚無遺汝曹戎籍足矣何

問金耶及卒妻子寡甚弟賢字廷傑洪武末以儒士  
薦授本學訓導遷南康教諭永樂中召入館閣預修  
大典為人嚴毅方直躬行純粹  
改任湖口湖口人塑像祀之

陳彥回

字士淵莆田人父立誠為歸安丞以非辜罹法  
全家戍滇南聞闕深泊彥回與祖母依南充丞

于仲和所闕中教諭履德政知其才以明經薦為保  
寧司訓三考至京承顧問者四十日太祖悅之授知  
平江縣建文初給事楊維中薦其文學廉幹召見擢  
知徽州丁祖母憂敝民詣闕保留彥回葬祖母於徽  
州北山下乃哀經請闕自陳出身所以詔釋其弟妹  
戍籍疏請終制不允乃還郡會靖難兵起朝命募兵  
赴援適弟彥回至自遼東彥回謂曰骨肉重聚天恩  
也汝歸吾將報國矣書務本二字遺彥回歸北軍渡  
江彥回率義勇往援被械至京不屈棄市時年四十  
七彥回守徽時嘗望祖母墓處旦夕泣涕徽人哀之



名其山曰  
太守山云

陳繼之

莆田人建文庚辰進士授戶科給事中立朝多建白燕師起繼之疏陳備禦六事復請除徐增

壽以阻逆謀不聽燕王即位  
奉旨詰責不屈詔磔於市

黃常祖

字邦經莆田人永樂壬辰進士授刑部員外郎以薦陞山西叅議招徠流亡民悉復業平陽盜

聚千人剽掠為害常祖推誠諭  
之皆降附尋致仕年八十六卒

林時

字學敏莆田人永樂乙未進士觀政刑部坐誥誤繫獄女淑圓年七歲擊登聞鼓訟寃時仁宗監國

奏釋其罪歷陝西僉事鳳翔延安等郡歲發粟以餉  
寧夏甘涼戍卒鳳延地寒少布奏聽民與戍卒以粟  
布自相對輸至今便之又奏設武學令軍中子弟得  
由科目進用於是推行天下皆設衛學秩滿陞貴州

按察副使

余燿

字叔炫莆田人永樂乙未進士初知進賢力正上和買之弊秩滿考最以母老乞歸少師楊士奇

薦之授吉安通判掌太和縣事有剛正聲人呼石余又目為沈水船

鄭述

字季述莆田人永樂辛丑進士授刑部主事宣德中調惠州惠人茅茨竹椽民多夜作易招火惠述令陶瓦為棟躬督勸賞其先就者不贍則賑給之火患以息擢知南雄府以權鹽餘息代民僱役復修築凌陂溉田五十餘頃砌嶺路以便大庾闕行役郡人至今頌焉

林祥鳳

莆田人宣德壬子鄉薦為鄆城訓導正統中以學行擢監察御史扈從北狩死於土木之難

黃謨

字聲叔莆田人宣德中以明經歷麗水訓導改青田時浙寇張甚衆以謨有才畧推以捍賊部署既

定乃諭以忠義衆感激一鼓而進賊遂潰天順中陞  
廣元教諭廣元為蜀北鄙戍卒多而編氓少學校久  
廢興修學舍建文廟教之如中州  
及去民立祠肖像祀焉孫顯有傳

### 翁世資

字資甫莆田人正統壬戌進士授戶部主事陞  
郎中適江南水災屬往勘驗奏免被災稅糧五

十餘萬石芻束倍之且撤所司賬邱英宗復辟摧工  
部右侍郎時東南水潦民苦艱食議減蘇杭五府上  
供織造之半疏進推主議者下世資錦衣獄貶知衛  
州抵官修石鼓書院立便民倉百廢具舉衛帥有戾  
法者世資稍抑之逆誣其怨望逮至京尋復其官成  
化元年遷江西左布政使會廣東寇發議令江西轉  
餉世資請齋銀就廣中糴之且奏蠲民賦百七十餘  
萬石五年陞右副都御史巡撫山東東土大饑世資  
發廩遣官分道賑卹民賴以濟八年遷戶部左侍郎  
十三年奉勅提督京通等處倉場尋進本部尚書再

疏請老加太子少保致仕  
卒贈太子少傅有水崖集

黃譽

字廷永莆田人正統甲子鄉薦第一戊辰舉進士授南京雲南道御史行部所至墨吏望風解組者

七十餘人時號括地黃喻去莠務盡也景泰改元遷浙江僉事有內官至寧波市舶縱義兒為暴譽捕訊

斃杖下尋擢湖廣叅政卒  
子穆翰林編修有父風

陳俊

字時英莆田人正統丁卯鄉試第一戊辰登進士授戶部主事景泰甲戌差徵天津等衛採秋青草

俊言舊逋未蠲新額薦積人不能堪詔減三十五萬東天順五年督餉兩廣假便宜從事時廣東鹽商多越境規利俊令每引輸粟二斗於南雄梧州兵不食民不出賦公私便之成化改元陞南太常少卿四年召為戶部右侍郎時邊事擾攘四方奏災傷文移傍午俊隨時裁決輒中機宜七年京師饑奉勅發太

倉粟百萬斛減價糶民俊慮豪猾射利請於朝糶滿石以上者禁不與八年河套告警督餉陝西請出內帑助邊除徑道以便飛輓軍興無乏比凱旋累遷南吏部尚書加太子少保致仕弘治元年卒謚康懿遺

官諭祭

替奠

柯潛

字孟時莆田人景泰辛未廷對第一授翰林脩撰

宗以合葬裕陵為疑下羣臣議彭時奏宜合葬孝莊皇后居左太后於千秋萬歲後居右潛復率僚屬上章力請卒如時議以內外艱歸既葬服未除廷推祭酒潛具疏力辭得不拜尋卒有竹巖文稿

嚴塗

字宗源莆田人景泰甲戌進士選翰林院庶吉士同修寰宇志擢御史督學南畿陞廣東按察使奸

民王黑皮等嘯聚為匪塗設策擒捕境內肅然晉湖廣右布政湖湘人士夾道歡迎尋轉左命下而塗卒

彭韶

字鳳儀莆田人天順丁丑進士授刑部主事成化初署員外郎疏論僉都御史張岐以壽寧侯兄驟

膺風憲非其才不可用請召王竑李秉葉威忤旨下詔獄尋復職晉郎中外戚周或與畿內民爭田韶劾往勘歸劾奏之復下獄科道文章論救出為四川副使進按察使劾太監錢寧冒貢珍奇擾驛遞陞廣東左布政疏薦陳獻章於朝時屢遣中使採辦土物韶屢有陳請復以論太監梁芳忤旨調貴州擢右副都御史巡撫蘇松嘉湖等處會星變應詔陳言條正家用人兵柄儉德漸不克終四事召入為大理卿改撫順天孝宗立晉刑部右侍郎浙西不靖劾韶巡視韶殲其巨寇陳輔劾罷守臣一人事遂定留治浙奏蠲宿逋鹽課復減奉順縣礦課歲萬八百有奇轉吏部左侍郎是冬彗見天津韶上厚根本減役錢正近侍慎官爵四事又請午朝無循故事凡時政得失軍國重情乞令臣僚就御前面議取旨並見嘉納五年陞

刑部尚書安達侯柳景總戎兩廣發贓鉅萬韶抵景於法復論皇親張巖瑩瑣逾制遂疏乞休暮年名德益尊行旅走卒皆知其名卒於家贈太子少保謚惠安著有名臣錄贊政訓等書

**朱寬**

字宏裕莆田人天順丁丑進士南禮科給事中成化改元與同官王徽等疏陳五事近侍御之會太

監牛玉有罪斥居南京寬復論玉有死罪四及大臣阿徇不言黨惡欺君之罪言甚切直謫判潼川卒

**吳繹思**

字思周莆田人天順丁丑進士歷知惠州時守禦軍政為上官所更卒伍忽將為變繹思諭以禍福皆羅拜內艱起復補潮州海寇竊發繹思計殲巨魁捷聞陞浙江叅政轉右布政卒

**林永齡**

字延年莆田人天順二年選升國學校翁源教諭攝英德篆巨寇黃諭養荼毒嶺南英德尤甚

永齡招徠散亡蠲貸征稅又募義民築城垣徙廟學於城內暇則集生徒講學以疾卒兩邑士民像祀之

鄭紀

字廷綱仙遊人天順庚辰進士授翰林院檢討以親老移疾歸起浙江提學副使孝宗登極紀疏請

御經筵近儒臣論聖學以正心為先召為國子監祭酒改南左道政時山東早饑民南徙者日無慮千百巡撫奏募吏承納銀賑濟紀上言江南糧穀見今泊淺山東乞量許截借俟募到銀兩糶運不惟流民得免溝壑而船輕亦易達於京師從之轉太常卿武宗在東宮行冠禮紀采古今帝王嘉言善行凡百條各繪圖作贊名曰聖功圖以進遷南戶部侍郎南畿災出餘米二十萬石充賑晉本部尚書致仕仙遊舊無城垣紀力請於官鳩工修築至今賴之有東園文集吟稿歸田錄奏疏各若干卷

陳音

字師召莆田人天順甲申進士授翰林院編修預修英廟實錄歷官太常卿在翰林時疏陳養君德

進人才開言路闢異端四事權璫黃賜有母喪省寺院監咸赴弔翰林亦有議欲行者音慨然曰翰林清



要相率而拜內豎之門如天下笑何汪直在西廠勢甚張音獨昌言與抗無所憚有遺藁數十卷軼不傳

楊琅

字朝重莆田人天順己卯鄉試第一甲申成進士拜監察御史憲宗登極詔罷鎮守內臣中外歡悅

未幾傳言欲復差鎮守琅疏極言內臣不可預政倖門不可輕啓疏留中不報復乞罷尚書馬昂翰林學士倪謙請起尚書王竑召還給事中王徽修撰羅倫俱不報歷浙江巡按江西僉事政山東提督學政以歲歉出賑行至東阿染病卒

林誠

字貴實莆田人天順甲申進士擢監察御史嘗因星變上言大學士商輅當康定易儲時不能執節

宜策免憲宗謂輅時有諍言外人不及知誠復疏論之下詔獄廷杖遂引疾歸成化末復原職命理兩浙鹽政適初春地震上弭災十事不報以疾致任卒子近龍正德戊辰進士授河南道監察御史疏發宸濠

營建及大學士靳貴勸賄  
二事歷廣西按察司僉事

**林正**

字克全，莆田人。成化丙戌進士，授監察御史。巡視山東、河道，宜鑄濬湮，令兩涯植柳以固堤岸。又造

橋一十二所，竣按蘇、松、常、鎮四郡，繩違雪枉，持法甚嚴。繼按廣東，首詢民瘼，輒形於詩，曰：鳳鸞自古高

鷹隼，郡邑於今尚爾然。豪黠聞

風，欲迹以疾，卒於官。年四十一。

**黃璉**

字汝器，莆田人。成化丙戌進士，授南戶科給事中。時汪直擅柄，王越相倚，為姦璉率科道極言之。憲

宗逐二人，悉去其黨。陞浙江叅議，巡視溫處銀冶。璉以新礦之開，徒為盜餌，奏塞之罷。其課改雲南轉貴

州叅政，累官貴州左布政。普安賊婦朱魯為變，朝命出師勦之。屬璉轉餉軍興，無乏。賊平方，論功而璉卒。

**黃仲昭**

名潛，以字行。莆田人。成化丙戌進士，選庶吉士。授編修，時命詞臣各賦元宵烟火詩，且出舊製

令擬述以進仲昭以詞近俳優非儒臣所宜與同官  
章懋莊昶上疏言烟火燈諸詩多鄙褻燕安之言  
今川廣弗靖江南早乾公私困乏遼左敵情難測正  
宵旰焦勞之日願採芻蕘之言端耳目之好疏入忤  
旨廷杖左遷湘潭知縣懋晷皆坐謫一時京師有三  
君子之稱先是修撰羅倫以論李賢謫外又號翰林  
四諫云弘治改元吏部尚書王恕薦起仲昭纂修憲  
宗實錄遷江西提學僉事乞休歸與陳獻章往來議  
論生平著述皆羽翼程朱辨易未濟卦春秋褒貶雅  
風升降及編次或問裁定通鑑書法証異咸有發明  
又刊布冠婚喪祭之儀以示後學所著有未軒集若  
千卷所修有八閩通志延平邵武府志南平縣志  
**周瑛**字梁石莆田人成化己丑進士知廣德州興文教  
毀淫祠嚴生女不舉之禁懋官至四川左布政使  
以母憂歸瑛嘗受學於陳真晟時與白沙陳獻章同  
郡林雍相往來自謂汨沒仕途其學始雜志欲觀斯

道之大全讀朱熹語類恍然曰從此用功當有見處  
於書無所不讀每辨析精微洞見原本嘗語人曰某  
居官行已知畏天命凡事自檢於心求合於天人則  
有不及知者學者稱翠渠先生著有教民雜錄祠山  
雜辨經世管鑰律呂管鑰字書纂要皆有發明又有  
翠渠類稿金陵金臺等編子大謨進士博學能文

方珪

字純潔莆田人成化己丑進士選庶吉士改御史  
巡蘇松常鎮及兩浙鹽課學士錢溥之子昂鬻販

私鹽巡撫畢亨檄蘇州府代其散給收利數倍珪置  
昂於理因劾其父貪利蠹法都御史附勢剝民知府  
朋奸不職狀自是豪猾相率斂迹及按真定諸  
郡擊貪剝弊人莫敢干以私卒於官年三十二

廖德徵

名珠以字行莆田人成化己丑進士授大理寺  
評事都御史朱英與中貴人交惡獄成德徵辯

雪之轉寺正陞湖廣僉事道卒揚州其妻  
括簪珥市棺衾弗辦揚州守某為之殯焉

方守

字宜約莆田人成化己丑進士為戶部郎奉勅督理薊永山海延寧等處邊餉出為雲南叅政其部

長以守當擢京堂且訝雲南太遠質之冢宰王恕恕曰豈不知守耶雲南萬里荒外官邪賂章用若人以剗除其弊耳時林俊亦為雲南憲副守與修明要束以拊循其人土司爭官奪印歲相仇殺守撫以恩信卒用寧息修堡立學變其風俗焉轉湖廣右布政以母喪歸御史宗彛聞其清苦給以田不受既卒林俊言於官助其喪葬事

黃榮

字儼仁莆田人成化壬辰進士由南刑部主事歷浙江僉事濬杭州運河自江干抵北關凡九十餘

里以多削豪右侵地為所中罷歸卒

周軫

字公載莆田人成化壬辰進士授戶部主事乙巳元日星變軫疏言誅元惡以快人心減內臣以清

朝政正朝廷以正百官罷方書以養聖躬親儒臣以  
論道經邦董料道以糾劾官邪杜僥倖以振作士氣  
量進鮮以差撥船隻以言事切直久不調尋進郎中  
京師大水南京大風雷詔詢時政闕失軫又言天子  
藏富於民皇亦有庄顧示以小宜革管庄如例畝限  
三分責民入租有司疏入留中出為山東運使乞致  
仕加職進江西按察使林俊志軫  
墓謂為未割之璞未災之木云

林元甫

字秉仁莆田人成化乙未進士選工科給事中  
詔充冊封占城以建言罷遣改南科復補禮科

尋陞都給事中嘗請建國本斥遠物及省費恤患諸  
事皆切時政遷山東左叅政歲旱饑議者欲歲額石  
加五升以備賑濟元甫謂加賦以害民不如勿賑宗  
藩墓妃大拓塋域元甫以非制且奪民田堅持不可  
厯雲南左布政陝西火篩犯邊餽餉繁重元甫隨時  
調度民不疲勞而軍無乏理右副都御史巡撫四川

蜀寇作設策平之移撫貴州再移雲南以疾乞休尋卒子有孚正德辛未進士僉都御史

林俊

字待用莆田人成化戊戌進士初授刑部主事轉員外妖僧繼曉以秘術得幸朝命建永昌寺費內

帑至數十萬臺諫喋莫敢言俊上疏論之以激直忤旨下詔獄謫判姚州憲宗旋悟叙復南都孝宗立擢雲南按察副使元化寺稱有活佛歲時士女會集爭以金泥其面俊命焚之毀淫祠三百六十區擢湖廣按察使值大雨雪上疏觸時忌引疾歸以薦起廣東右布政使辭未幾拜南都察院僉都御史提督操江又疏陳時政八事薦謝鐸儲懽楊庶曹時中堪居官僚處士劉陔可布衣入侍東宮江西盜起都御史韓邦問捕擊無功勅俊巡視親入賊巢賊渠王武率眾聽撫即以俊代邦問寧庶人倍取祿米侵牟民利恣裁抑之又論其府殿易琉璃瓦之非至舉叔段京鄙吳王几杖為戒丁內艱歸武宗初起仍巡撫江西力

辭適四川盜藍廷瑞駢本恕等倡亂改撫四川勅專  
征乃倍道進至通江斬獲三千餘級追過大小巴山  
分蹶之轉戰皆捷已聞瀘州賊曹甫謀據江津馳赴  
援乘元旦賊醉無備夜叩枚燒其營斬曹甫而藍鄔  
餘黨復熾督兵還擊設伏躡之薄諸河賊勢窮感乞  
降捷聞進右都御史賜銀幣既而江津餘寇收合數  
萬人來攻復大敗之斬獲幾二萬再賜銀幣俱不受  
兩川既平權要言其能會誅劉瑾俊疏賀且言瑾雖  
誅權猶在近倖安知後無有如瑾者請召用先朝老  
臣劉健謝遷以復舊政併請擇宗室育之官中用事  
者滋不悅乃聽致仕世宗即位召為工部尚書改刑  
部內侍私人李陽鳳犯法事下刑部內降改付鎮撫  
俊執奏不遣舉祖宗故事以聞竟不能回遂移疾乞  
休章入上乃允加太子太保越三年卒年七十六穆  
宗改元加贈少保賜奠祭謚貞肅有文集及奏議各  
若干卷子達字志道正德甲戌進士歷官南吏部考



功郎中工篆隸能

古文有自考集

彭甫

字原岳莆田人成化辛丑進士授南戶部主事遷員外郎積書數萬卷公退據案疾讀至忘寢食擢

廣西提學僉事改湖廣值劉瑾擅政甫賦壺南招隱詩以見志遂疏乞歸

宋端儀

字孔時莆田人成化辛丑進士歷禮部郎擢廣東提學僉事生平稽訂經史於程朱微言緒論

皆洞究指歸著有考亭淵源錄莆陽人物志子元翰弘治乙卯鄉試第一知潮陽潮大姓好武斷陰持人罪相構陷元翰諭以釋怨修睦民感懷之山賊曾紀頭犯境討平之尋乞歸

丘天祐

字恒吉莆田人成化辛丑進士令饒平訪陳獻章於白沙究性命之學秩滿授監察御史論威

寧伯王越附事中貴李廣貧緣三邊總制疏入忤旨廷杖六十下錦衣獄尋釋又劾李廣恃權縱恣婪賄

狼籍狀廣仰藥死檢廣貲財數百萬籍沒之差按廣西旋按南北畿疏陳江南葦場不宜遣巨璫宜歸工部居臺中十三年以疾乞歸卒

林堪

字舜卿莆田人成化辛丑進士知長興縣改漢川

嘉靖初都御史何孟春薦堪行超流俗政娘古人宜命有司存問優卹得旨年九十七卒子應聰字汝桓

正德丁丑進士官戶部員外郎以論

救朱泚馬明衡等下詔獄謫縣丞

鄭寶

字時珍莆田人成化癸卯舉人歷鬱林州同知署北流縣事劇賊李通寶等攻劫縣治列柵五里許

寶經畧庫藏案牘選勁卒百餘從問道護至州遂督兵出戰數陷堅身被十餘創子圭見父戰不利躍馬與從奴十餘人馳救亦被創父子同日死事聞贈本州知州廕一子入監同邑人雍汝和為雲南提舉安

鳳之變死於黑鹽井陳祚為廣西古田典史亦與賊戰歿黃起喙為桐梓尉天啟初安春二酋圍成都起鳴募兵復諸城酋傾巢出鬪力戰死弟男皆陣亡三人俱發身掾吏死職同故附之

陳仁

字子居莆田人成化癸卯鄉試第一丁未進士歷戶部郎中大司農韓文允倚任之正德初劉瑾擅

政忌文摘其官屬細過謫仁禹州同知轉知汝州遷南兵部員外瑾誅擢浙江提學副使轉本省叅政進右布政致仕嘗疏止給事林廷玉外謫追復御史彭程官及闕里災禮部繼燬仁指陳時政言多剴切

方良永

字壽卿莆田人弘治庚戌進士刑部員外郎擢廣東僉事攝海南兵備瓊州賊符南蛇作亂會

諸道兵勦滅之補海北兵備復擒巨賊黃李帥等羣盜悉平以入朝不謁劉瑾勒致仕瑾誅起為湖廣副使河南劇賊趙燧通湖湘間良永計擒之陞廣西按察使巡按御史朱某挾勢多為不法良永暴其奸御

史自勅去進山東右布政使轉浙江左布政倖臣錢寧遣僕鬻鈔於浙索銀三萬餘兩同列謀取於民良永爭之不得因疏寧負主剝民之罪乞正典刑仍勅鈔價已斂者還民未斂者停止併究影射侵尅之弊疏至通政司私以示寧寧懼留疏不下遣枝尉三人來浙緝捕假勢鬻鈔者下令散還前價良永知寧啣已請致仕世宗登極誅寧起良永副都御史撫治鄖陽再疏乞終養丁母艱服闋命總督糧儲兼撫應天未至除尚刑部尚書卒賜祭墓謚簡肅弟良節同榜進士官至廣東左布政兄弟同時掌方面人以為榮子重焘以孝行稱有傳孫攸績嘉靖癸丑進士歷官山東布政使

**黃顯**

字伯望諡孫弘治庚戌進士授戶部主事詔為皇親張鶴齡母金氏造第顯疏言祖宗待外戚自有

定制陛下賞賜鶴齡庄田動以千計恩寵無比今又有興造之舉妄費國帑福過其度雖厚必折宜擇嚴

師傅教誨之誠以節用惜福使其以仁積德以禮行  
儉不宜上累聖德下困民力奏上朝議建之知肇慶  
府改武昌擢廣東左叅政卒林俊志其墓  
謂治肇無繼治武昌無前治廣無為並云

林有年

字以永莆田人弘治壬子鄉薦歷蕭山東莞教  
諭謁張訥於南海訂朱陸異同刻正學階梯以

端士習擢知繁昌歲饑割俸以賑蘆洲荒不可壑奏  
蠲其課遷南御史一歲七言事咸切時政以諫武宗  
迎活佛被逮謫武義丞量移樂清令嘉靖改元以御  
史知衢州扁清獻遺風於齋閣創惠民橋築塘堰數  
百區擢貴州按察使致仕著有  
寒谷東山諸錄卒年八十九

林有祿

字以賢有年從兄弘治壬子鄉薦官安慶同知  
宸濠反引舟師數十萬將窺留都公安慶知府

以下皆股栗失措有祿令毋輕動以搖民心乃佐調  
兵食畫地守禦身先士卒不解甲者匝月宸濠敗有

禄口不言功轉淮安  
運同歷知瓊州歸

鄭岳

字汝華莆田人弘治癸丑進士授刑部主事論錦衣十戶張福語涉中貴孝宗怒下詔獄以救免又

論副總兵趙昶出師偵事無功不宜再遣出為湖廣按察僉事尋擢廣西兵備副使征黑松洞賊奏捷調廣東副使累遷江西左布政使時宸濠有逆萌橫奪民田民設寨聚守濠諷總制出兵勸之岳力沮後竟為濠所枉坐罷濠敗中外交章論薦起都御史巡撫江西入為兵部侍郎駁正大瑞冒陞子弟戰功權倖側目又以議大禮忤旨奪俸力乞休致著有山齋淨稿吟稿奏議駁稿莆陽文獻莆陽志畧等書

陳琳

字玉疇莆田人弘治丙辰進士選庶吉士改監察御史提督南畿學政疏陳弊端本修政十五事正德

初逆瑾亂政大臣劉健謝遷並去位言官戴銑等被逮琳上惜老成宥狂直以全聖德疏謫揭陽縣丞瑾

復矯旨列健等數十人為朋黨榜朝堂琳與焉瑾誅起嘉興府同知歷廣東左布政嘉靖初錄先朝言事諸臣拜右副都御史巡撫江西時逆濠始平兵荒交困琳請蠲租賑乏民若更生改大理寺卿擢南兵部右侍郎卒

陳茂烈

字時周先世浙人茂籍興化衛茂烈早失怙繼戎役晝入公署夜歸讀書祖母憐其弱亟止之

乃韜燈默誦潛心學問上希顏曾作者克錄弘治丙辰第進士奉使廣東謁陳獻章執弟子禮獻章告以學須靜一退又作靜思錄始為吉安推官召入為御史衣布乘北彈劾一無所避時有崔志端者以道士為尚書再疏論之謂以羽流而任天子股肱喉舌辱國莫甚於此不報遂乞歸終養躬自灌園執蔬太守憫其勞遣二力助役白還之終日危坐一室以窮理體道為事語人曰儒者有向上工夫詩文特土苴耳

吏部以茂烈清苦奏改為晉江教諭使資祿近地辭  
不赴令有司月與米三斗復疏辭不允嘗以母年九  
十未有嗣息為憂方抱疾而母卒強起號哭寢地疾  
轉革亦卒林俊為治殮立其族子達揚為後都御史  
王應鵬疏言茂烈廉約如石守道而所養獨純孝行  
如徐仲車而所處尤困詔表里宅曰孝廉祀鄉賢卹  
其家林俊謂茂烈穎悟既深而克養益熟隱  
米粹行可對天地質鬼神黃憲管寧之流也

**黃體行**

字于道莆田人弘治壬戌進士歷授戶部員外郎正德甲戌乾清宮災體行應詔陳言請修省

以答天譴時番僧義子邊軍蠱惑兒戲征欲有皇店  
內市打毯錢之號童豎誘車駕潛游外市朝儀廢而  
不修宮寢疎而不行體行指陳無諱武宗  
怒削其籍嘉靖初擢知處州府尋乞致仕

**劉陔**

字子賢莆田人少長知學即絕意科舉求占聖賢  
視身訓家之法率而行之以父與祖母二喪未葬



遂斷酒肉遠房室朔望號哭殯所者三年疾鄰憐之  
為襄葬事焉奉母至孝母或恚怒則衣冠竟夕跪牀下  
婦失愛於母出之祭祀莫獻一滴禮經太守王弼延  
致邵齋曰此人消鄙豈減黃憲置田五十畝資其孝  
養閔辭不獲母歿即送還官林俊起留臺疏言閔學  
行高古宜徵侍東官講讀不報後以御史宗彛知府  
陳效薦授本縣儒學訓導閔生平學問不言而躬行  
嘗作主靜箴以自省彷彿程氏四箴著有家禮考註  
昭穆圖宗子說五倫  
啟蒙孝經刊誤等書

林茂達

字孚可莆田人父思承景泰甲戌進士知冀州  
奏蠲蕪田賦二千頃增築堤堰以禦漳河水患

歷官淮安府同知茂達生有異徵登弘治壬戌進士  
授行人拜監察御史出按畿甸擢湖廣副使轉貴州  
左叅政鎮西鄙諸蠻剽掠迫城堡據溪以絕泉汲茂  
達設守備因上流鑿石為井由地中行二里許城中

利汲蠻大驚引去號林公升嘉靖初累遷四川左布政使邊糧率十數鍾致一石輸者蕩產茂達計儲遠近費多寡融徵分解而督以官民用弗因陞右副都御史致仕復起南大理寺卿疏辭允之會明堂禮成有司奉朝命備禮勞問年八十六卒

**林富**

字守仁莆田人弘治壬戌與叔塾同登進士授大理評事忤逆理繫詔獄謫朝陽丞瑾誅起袁州同

知應慶州府時山寇湯毛九倡亂富親擒其魁殲其餘黨數百人嘉靖初歷擢廣東右布政調廣西田州岑猛死其土目盧蘇王受挾猛子邦相叛據思思出掠至齊墟將逼武緣富至兩廣都御史姚鏞委以兵事富決策分部諸將先趨思恩為內應賊勢挫乃聽撫會鏞解去代者王守仁復相委重蘇受率眾七萬來降朝議欲改土設流富謂思州宜流官田州土官必不可廢但須稍降以分其勢從之富久居邕管知

入寨猛賊與思田勢相倚請守仁移兵征勦師出而  
富巴陞四川左布政復陞都察院右副都御史撫治  
鄖陽毅然請終其事冒暑兩提兵入險擒斬無算奏  
凱而後啟行守仁卒遂陞富兵部右侍郎兼右僉都  
御史代總督之任富督兵兩廣五年以次討平嶺東  
賊王基海寇黃秀山及廣州會寧等處寇攘累蒙詔  
書褒獎顧其意則不喜用兵曰保固疆圉休息士民  
為國家衛元氣邊臣責也因此與御史異議屢疏乞  
休歸構小亭於東山優游其中卒年  
六十六有奏議二卷子萬潮見文苑

**吳大田**

字紹曾莆田人弘治甲子鄉薦授扶溝教諭遷  
興府伴讀世宗入嗣扈駕督潛郎軍校所過不

擾抵京遷太常寺丞晉少卿充國史官預修獻皇實  
錄賜白金文綺累陞工部左右侍郎裁冗費惜民力

以勤慎稱  
後致仕卒

黃鞏

字伯固莆田人弘治乙丑進士歷兵部職方郎中

丁內艱服除將赴補值武宗北巡人心危疑其弟請鞏勿行鞏題書屋曰茅屋石田為生太拙鵠夷馬革自許何愚竟北上補武選武宗復南巡時宸濠久蓄逆謀江彬握勁兵在內鞏曰上游巡本由彬誘惑吾不可舍彬為支語疏上六事曰崇正學通言路正名號戒遊幸去小人建儲貳語極激切同舍郎陸震見疏頗同署名彬見疏大恨下詔獄械手足廷跪五日杖百餘除名震竟死鞏死而復甦遺弟詩曰不用汝謀方至此須知吾道固當然歸杜門著書賃米留客日中未費爨如也嘉靖改元起大理寺丞疏辯大禮反覆千餘言以疾卒贈大理少卿予祭鞏嘗曰人生仕宦至公卿大都三四年惟立身行道可以千載著有後峰集行世

周宣

字彥通莆田人弘治乙丑進士授常德推官拜監察御史巡按山西將行會武宗南巡率臺官疏諫

蜀跪端門外烈日中三日及蒞山西去墨吏固邊圉  
政畿內督學世宗自藩邸入繼宣首疏治安之策在  
培元氣伸士氣其要在端聖學大禮議起宣疏引濮  
議折衷程子以正張字敬之說久之督學山西愆廣  
東布政坐誣免歸著有秋齋集子覲  
嘉靖戊戌進士愆江西按察副使

馬思聰

字懋聞莆田人弘治乙丑進士為象山令復二  
十六渠以溉田厯南戶部主事督糧江西與宸

濠生辰之宴次日入謝思聰度必有變語厨人曰我  
倘不出將勅書藏於高處厨人未喻及入濠伏兵殺  
都御史孫遂副使許達下思聰獄與叅議王宏俱不  
食死事聞詔江西立廟並祀額曰旌忠贈思聰光祿  
少卿子明衡正德甲戌進士官監察御史世宗朝昭  
聖太后生辰有旨免朝賀明衡上疏極諫下詔獄世

稱雙

忠

王大用

字時行，莆田人。正德戊辰進士，授工部主事。董漕臨清流，賊劉六突至，大用選勁卒據險迎敵。

賊失利，引去。擢廣東兵備僉事，以次討平樂、昌清、遼新、遼新興、順德香山諸賊，攻拔旗坑、菜塘、西坑、癩利、黃藤坑、黃華洞諸寨。前後斬獲賊帥俘，截數千人，加副使，備兵如故。復征白水、黎蠻及嶺西高涼洞，僚俱有功。陞廣西左布政使，為順天府尹。晉右副都御史，巡撫大同。大用至，禁淫酗，課墾，耕屨間中以通商。鹽營堡落以備哨探，破巨盜劉善果，追斬之。大同巡按張祿與大用抗禮不合，嗾給事秦鰲以虛事論劾，改撫順。天值歲饑，躬行賑濟，復疏陳防邊三事。陞右都御史，會朵顏三衛誘北兵千餘，假名入貢。大用庶得其情，戒兵設伏，敵謀泄，宵遁。大用令獻黑谷關地，至太平寨五百餘里，與飲盟去。張祿復論太用生事，搆怨坐免。起撫四川，獲白光不表，聞而地震。水旱輒請修省，蠲租。時世宗方齋祀，太乙羣臣爭上符瑞，見大

用疏心厭之已擢南刑部右侍郎卒子邦圻求卹典  
嚴嵩當國格不與忽中旨下如邦圻所請人稱惟事

**陳傑**

字國英莆田人正德戊辰進士授知景寧邑有巨  
猾陳盪傑置之法盪賄上官誣傑以罪父老奔走

號訴願為侯死事白盪論罪而傑運任擢南監察御  
史嘗語人曰辨義利審真偽為聖賢實學波科舉特  
筌蹄耳秦疏若干首皆切時務父卒哀毀廬墓王守  
仁稱其篤信好學高潔自守年五十六卒著有易經

縵  
屑

**鄭玉**

字于成莆田人正德辛未進士由戶部郎出守徽  
州豪右多喜訟玉以情理諷諭令解釋或以貲求

勝及賄有力者為關說輒彈治不貸擢江西  
按察司副使與安仁桂萼不相得遂自免歸

**林文俊**

字汝英莆田人正德丁卯鄉試第一年未成進  
士授編修歷南北國子祭酒乘輿臨幸文俊講

說元首股肱之義稱旨賜衣二襲陞南京禮部侍郎  
轉吏部逾年卒世宗憫悼御筆特謚文修贈禮部尚

書有方  
齋存稿

朱鳴陽

字應周莆田人正德辛未進士拜戶科給事中  
轉禮科都給事中時武宗昵狎嬖人好巡幸鳴

陽疏言大駕時出恐蹈白龍魚服之戒宜正江彬錢  
寧等典刑又言前星未耀請遜親王可承天序者居  
京師防意外之虞不報殿廷災請罷鎮守大璫任正  
人黜奸回以消天變言俱剴切世宗即位大禮議興  
鳴陽主司馬光濮議與張孚敬不合又攻其短孚敬  
却之出為浙江叅政降雲南叅議孚敬罷復故官轉  
浙江右布政使致仕歸

彭大治

字宜定甫之子正德丙戌進士為南戶部郎知  
揚州府閉關固竊罷一切無名供費以法律取



豪右為貴勢所中調知叙州值川北洞蠻叛督府檄  
大治撫之大治親入山谷諭攜相率釋甲羅拜即時  
解散丁外艱服闋改知韶  
州進長蘆運使卒於韶

**劉勳**

字紹功莆田人正德甲戌進士授刑部主事改吏  
部嘉靖初伏闕抗疏議大禮忤旨受杖歷考功郎

為桂萼方獻夫所不喜調南禮部郎歷四川叅政平  
巨寇李和尚之亂遷副都御史巡撫寧夏引疾歸

**林大輅**

字以乘莆田人正德甲戌進士為工部員外郎  
武宗南巡兵部郎中黃鞏等疏諫下詔獄大輅

偕同官蔣山卿何遵論救請與諸臣同效死並下詔  
獄廷杖幾死謫彙陵州判大輅曰一日食君祿當一  
日盡職吾敢暇逸為於是釐隱田以清賠課徭役輕  
重固有弗均建書院公餘與諸生講論文風以振嘉  
靖改元歷陞副都御史巡撫湖廣屬水旱民多流徙  
濬封工役繁興諸司告匱大輅停工蠲賦以贍流移

引咎自劾以觸時忌罷歸著有愧瘖集若干卷妻黃氏當大輅下獄日每夕焚香告天冀回聖意鄰人以宿怨誣為咒詛並逮於獄廷鞫備受慘酷拶指至斷不承曰妾祝天唯冀皇輿勿出免蹈不測耳敢望承

咒詛大罪貽夫子慘辱居五月俱得釋

黃待顯

字君俊莆田人正德丁丑進士授戶部主事歷員外郎中世宗更定章聖太后尊號待顯與何

孟春豐熙等伏闕言尊崇之典明詔已定今忽去本生二字是重所生而忘所繼也奏入留中待顯復同孟春等跪哭左順門聲徹大內世宗怒命繫獄拷掠編伍成廣東碣石衛十三年九廟告成釋歸歲餘卒

隆慶改元追贈太常少卿

張曰鞫

字席珍莆田人正德丁丑進士授常州府推官會武宗南巡江彬縱其黨數十輩下鎮江橫索

民間常州人聞風亡匿曰韜召父老併二三豪傑約曰彬黨且至若等並力與格又釋囚徒呼乞兒輩各具瓦石部署既定而彬黨累騎來父老與豪傑遮境上叱曰客何來者常州連歲災沴物力大絀無可啗爾郡中惟一張司李一錢不入即欲具芻草以抹若馬亦卒莫辨言已囚徒乞兒輩奮呼運至彬黨怪之疑有他變稍卻復揮策徑入飛石飄瓦爭中其額乃踉蹌退里許疾馳告彬曰韜亦上書御史臺言狀御史省書即行部抵常密謂曰韜事迫矣彬且以他狀東君行奈何乃以已舟載曰韜令先發而自以小舟尾之彬黨果誤截御史舟御史命疾捕欲具聞諸黨悉遁去後御史置所捕勿詰而彬亦誠其黨毋得再下郡國矣世宗登極擢監察御史入臺四月陳七疏最後抗論大禮廷杖委頓越三日卒隆慶改元贈光祿寺少卿從姪英嘉靖辛丑進士授監察御史巡按河南亦有風力厯官貴州左叅政

林若周

字吾從，莆田人。正德丁丑進士，知博羅縣。有禦寇全城功。嘉靖初，徵為監察御史，內閣。楊廷和

戚畹，崔文內官，扶安等議予世襲。伯爵若周上採羣言，寢成命。以隆中興初政，疏又為王守仁有江西功。遭讒，口毀，抑治中。王槐監生何淵等附會張璉、霍韜，以亂大禮，疏請闕邪，說消朋黨，以扶世道。復論蔣輪、邵喜、累寵濫恩，張銳、張雄有罪，漏網財用過於侈靡。進言少見容納。諸所建白，悉關國體。以父母年老，乞侍養，歸後累薦不起。家居四十餘年卒。

鄭洛書

字啓範，莆田人。正德丁丑進士，知上海縣。有惠愛，入為河南道御史，章數十上。閣臣費宏與詹

事張璉、文忌洛書疏論二臣，以微卻持長短，勢不相下。必引門生故吏陰相彈射，釀朋黨之禍。會李福達獄起，世宗欲御端門，臨問大臣，經斷斯獄者，並械繫以聽。洛書上疏力爭罪，且不測。內閣楊一清為請得

釋久之推補南畿督學轉浙江道御史再歲卒後三十年莆城陷其子開貧困往依上海人羣泣曰此政

孫叔教兒也釀金置縣田以奉洛書祀

王鳳靈

字應時莆田人正德丁丑進士授刑部主事時

鳳靈疏論銳等為逆瑾爪牙錢寧羽翼非交通宸濠則結好江彬請誅之以伸國法不報給事陳洸有罪世宗以議禮故庇之鳳靈又言議禮自議禮犯罪自犯罪何得援此以淹彼時論題之出知襄陽府以母喪歸服闋補知淮安疏請蠲秋糧雜賦出餘鹽銀以賑民歷廣東叅政歸所著有淮陽稿行世

姚鳴騫

字景雍莆田人正德辛巳進士觀政兵部世宗即位疏陳七事議大禮尤切直官終淳安知縣

弟鳴鳳字景陽正德丁丑進士授南御史李福達獄與鳴鳳與同官高世魁連疏劾奏武定侯郭勛亂法

縱寇黃緣戚皖誣奏大臣勛為亂首福遠法在必誅  
忤旨逮繫詔獄削籍子虞嘉靖士辰進士為御史巡  
按湖廣值歲荒繪流民十  
二圖以進官終淮安知府

鄭一鵬

字九萬莆田人未冠領正德癸酉鄉薦辛巳第  
進士選庶吉士改戶科給事中轉吏科嘉靖甲

申上黜邪說正大禮疏忤旨廷杖三十又論席書桂  
萼張字敬方獻夫等妄議搖國是及武定侯郭勛通  
賄賂皇親張鶴齡占田土罪狀請重經筵罷齋詔卻  
貢獻有諫官處邊儲設兵備等疏皆關君德切世務  
卒為權倖所擠復廷杖六十罷歸卒隆慶改元贈光  
祿寺少卿子應齡嘉靖戊午鄉薦令淳安有清操終  
銅仁  
知府

郭日休

字德夫莆田人正德辛巳進士授戶部主事世  
宗初議大禮曰休疏持濮議爭甚力詔下錦衣

獄杖三十落職久之復官遷郎中累遷貴州按察使  
以事與御史相持即日投級歸板輿奉母母年百歲

日休亦八十  
著有九華集

朱澗

字必東莆田人正德丙子鄉試第一嘉靖癸未進  
士授監察御史甫閱月遇昭聖太后壽辰有旨免

朝賀澗疏言皇太后親挈神器以授陛下母子至情  
天日在監若免朝賀則無以慰母心而隆孝治同邑  
御史馬明衡亦上疏曰暫免朝賀若出於皇太后則  
中間必有因事拂抑之懷往來存歿之感若出於聖  
意則陛下母子之情有加無已豈以皇太后聖節而  
忍輟此盛禮世宗震怒差官校梓二人至內廷詰問  
下詔獄輔臣蔣冕泣救各予廷杖為民澗歸以奉  
親為娛內外交薦不起著有天馬山房集十卷

柯維騏

字奇純莆田人嘉靖癸未進士授南戶部主事  
引疾歸鍵戶息友以明道著書自任負笈門下

者四百餘人問辨心學講釋經傳期於實志實功竅用作左右銘講義問答等篇復著有宋史新編史記考要續莆陽文獻擊異訂譌上下古今嘗謂求士於三代而下必以砥礪名行為本功業文章則又其次家居五十年前後撫按臺垣交薦皆不起年七十八卒

### 林學道

字致之莆田人少從蔡清學復入江西從王守仁訂良知之說游學吳下有僉事某延之既抵

門聞其居憂宴會曰此非吾徒也遂不入徐階謫延平推官請與相見不佳嘉靖間以貢司訓都昌會階亦督學江西喜曰吾今得見林致之矣題其像曰顏勤閔孝柴愚參魯岩在聖門依稀參伍後為無為州學政司徒馬森守太平為學道及門士有致千金求一札為介者學道卻之致書森曰各守職業為吾道重無煩使者往來也尋卒學者私謚曰貞修先生著有原教錄二卷



方一桂

字世芬莆田人與兄一蘭同登嘉靖癸未進士知蒲圻縣調宣城以治行徵擢廣東道御史巡

視居庸關條邊務十二事繼按山東請墾荒地以增營田正孔廟從祀以光聖道俱報可復掌道事以疏救僉都御史史道廷杖二十選職督直隸學政復疏言冢宰汪鉉納賂枉法狀且言陛下杜天下口已三年矣世宗大怒復廷杖六十削籍卒於家隆慶改元增光祿寺少卿

鄒守愚

字君哲莆田人嘉靖丙戌進士授戶部主事歷員外郎中奏發帑金賑全陝饑諸中貴冒芻艾

招納亡命守愚劾之出守廣州辨誣獄出累歲寬繫數百人新會民激於微逋入海為變監司招之不應曰必鄒使君來守愚單騎往諭民輒涕泣解散丁外艱歸服除起江西憲副攝學政轉湖廣叅政授方畧禦苗苗遁會常德饑便宜發長沙兵米賑之歷河南左布政使討平歸德諸寇擢右副都御史巡撫其地

旋晉戶部左右侍郎以山西河南地震奉命秩祀河  
嶽百神兼賑卹以積勞卒贈右都御史謚襄惠賜葬

祭著有俟知堂集史疑易  
釋義奏疏詩稿若干卷

林雲同

字汝雨莆田人嘉靖丙戌進士選庶吉士改戶  
部主事權稅九江轉浙江提學僉事累遷浙江

左布政使旋晉右副都御史巡撫湖廣時辰沅師興  
督府檄取行糧數十萬雲同感然曰楚比歲不登物  
力盡矣可竭澤乎乃奏貸輸邊歲例粟十五萬給民  
有屬縣李某昵嚴嵩子以賄遷內臺雲同疏摘其狀  
聽勘得白掛冠去隆慶改元起刑部左侍郎陞南工  
部尚書以歲漕奏免江南十縣蘆洲課十之五章五  
上請老乃允萬歷時復召為南刑部  
尚書尋子歸卒贈太子少保謚端簡

林允宗

字希曾莆田人嘉靖己丑進士初知樂清民有  
兄弟相訐者允宗故不為理令退而思過後式

好如初臺使者檄遊鴈蕩以邑疲不能具供帳力止之擢刑部主事出佐太倉州厯守衡州征苗調兵舊多以罷民嘗賊元宗選精銳三千人赴之芻糧器械悉備苗平全師歸以內艱解職遂不復出卒年九十

三子民止民

悅俱進士

魏一恭

字道莊莆田人嘉靖己丑進士為張璉所拔授温州推官璉有姪在郡獄一恭閱成案論如

律璉叩之轉撫州同知擢刑部員外郎有巨璫殺人禁地下刑部獄部長周期雍欲曲庇之一恭殺熊曰法行自近不可輕縱期雍無以奪厯遷廣西提學僉事轉浙江副使開府朱紉行部至議於定海島中築城列戍一恭以工役需時靡費不貲且波撼難久堅持不可紂不憚遂以他事論劾疏已發御史裴紳言一恭有盛名劾且不利遣疾騎追還厯陞廣西左布政使卒於官御史入視裝篋無他物所餘俸錢並寄

在庫御史大慟  
疇之喪始得歸

陳光華

字道蘊，莆田人。嘉靖己丑進士，授祁門令。內艱，歸補深水。值河水暴漲，文廟將圯，徙就元妙。

觀高原，遷真武像於他所。百人舁之，不得前。光華為文以告輦，遂舉轉南戶部郎。遷雲南知府，點國公沐朝輔薨，其妻陰取他姓子承襲。弟朝弼請於朝旨，下勘問，撫臣以屬光華。朝輔妻入萬金為賂，光華不納。庶其子非真朝弼，應繼議上報，可累遷雲南叅政。太宰李默為嚴嵩門客，適文華誣奏下獄，憾者指光華為默黨，落職家貧，敝屋而居。叅政萬某嘗以寺租屯田為餽，辭曰：「不欲以惡業遺子孫也。」

唐時雍

字子協，莆田人。嘉靖辛卯舉人，司教泗上。遷望江知縣，歲大侵，出廩粟俸金以餉饑者。邑人賴

之轉，寧波通判。移倅彰德，補淮安。以不能俯仰，上官罷歸。子維城，字邦翰。嘉靖乙丑進士，由南工部郎出

守青州值大旱躬禱輒應有麥秀五岐之異廷議開膠萊河維城以工難遽就令百姓棄農桑執畚耨無益青州故不養馬有議當如充濟例者維城復以邊海斥鹵難供牧畜為言事俱寢俄以疾告郡人走玉帛奔禱如急父母既卒囊無餘金士民為治殮具歸其喪

**林華**

字廷彬莆田人嘉靖壬辰進士授戶部主事謫六安州同知巡按及督學建岳麓書院檄華王之著

岳麓口義十卷移佐長沙摧知鎮江府相夏言以獄囑華不從啖御史誣奏華激變逮繫詔獄瀕行哭而送者幾萬人逮者愕然且笑曰是可以為激變矣至京自辨世宗薄其罪罷為民

**鄭汝舟**

字宜濟莆田人嘉靖壬辰進士授南海令邑人馬叅政家僮拷殺園丁汝舟置之法因造毀當

事有憾汝舟者論劾之吏部侍郎霍韜知其無他白改應天教授歷遷湖廣僉事築長堤以捍漢水汚人

賴之守顯陵關廖斌縱皇庄人戶侵奪齋民汝舟與御史包節大索庄戶治之轉江西叅議湖廣副使卒

官於

黃大廉

字深甫莆田人嘉靖壬辰進士知長洲縣置豪

察大廉解官狀起為吉安教授歷轉貴州叅議黔人素不知學大廉與講經義諸生喁喁知變三殿工興採木貴陽大廉督採務以縮費戢民人賀萬壽節不謁嚴嵩六年不調乞休歸先是武選郎張紳以發嚴嵩父子奸編戍貴陽大廉馳往問勞且遺之金紳曰累臣不以釁鼓執事者未甘心也紳不足計公獨不為己謀乎大廉曰季行父有言見有禮於君者愛之如孝子事父母也大廉恨不忠事君矣遑恤其他遂與紳泣別而去

鄭芸

字士馨莆田人嘉靖乙未進士授松楊知縣移上虞首濬沙河通商舶清置傳復上妃白馬夏蓋三

湖即以歲入魚蝦錢倡築上虞城後倭犯浙東獨上虞以有城免絳籍召為監察御史持節按視居庸等關疏修外堡防間道上三邊圖序詔行之時嚴嵩及子世蕃結寵近侍芸與御史陳策伊敏生上疏劾之詔奪俸策亦莆田人與芸同舉進士為嵩所擠奪職

張秉壺

字國鎮莆田人嘉靖戊戌進士由上海令入為戶科給事中戊申懷來失事秉壺奉璽書往視

徧歷塞上得山川扼塞狀繪圖上方畧詔下本兵如秉壺議行進史料都給事中時世宗齋居久秉壺率同官上疏請還大內視朝聽政以風勵百官真人陶仲文封恭誠伯秉壺復疏言祖宗故事非軍功不封仲文起自微細以禱雨故猥荷苴茅之典何以為勞臣勤願收還成命不報厯尚寶司卿尋進太僕寺少

卿以忤嚴  
嵩罷歸卒

林應箕

字輝南莆田人嘉靖戊戌進士選行人擢御史

當祛者濬海口諸水利民用沃饒復按兩浙會台州  
倭寇大至應箕開丁壯授兵登陣檄旁郡兵赴援閱  
月倭遁去追斬無算疏陳禦倭事宜及戰守數十策  
請復巡撫重鎮築沿海諸邑之無城者俱報可後倭  
寇復至甌東列邑吃不為患尋丁內艱補掌京畿道  
刷卷時道士陶仲文以長生之術得幸宮中齋醮無  
虛日採芝採香之使四出香蠟派買動盈數十萬應  
箕疏諫請誅仲文以謝天下疏上詔杖四十仍供職  
會長星示變為趙文華等所中坐判六安闕撫農館  
復安湖東陂查陵龍陽等塘數十區六安人立祠以  
祀移衛輝司理厯湖廣叅議左遷判淮司運  
寧國司馬以繩寧國守某去官年六十四卒



郭應聘

字君賓莆田人嘉靖庚戌進士授戶部主事遷員外郎出守南寧擢四川兵備副使歷廣西左

右布政使累著戰功晉副都御史巡撫其地計擒羅陽巨盜韋金彪平府江懷遠永福諸徭寇水陸大小數十戰下堅壘百十餘條上懷永善後十事詔從之旋召為戶部侍郎久之徭復熾朝議以應聘熟粵事以兵部侍郎再撫粵西諸徭聞之各鳥獸散晉右都御史兼侍郎總制兩粵尋晉南兵部尚書以舊京尺籍久虛疏陳勾軍四議會疾作猶上安民四議乞骸歸卒贈太子少保諡襄靖子良翰字道憲以廕官黎下知府著周禮古本註解忠義類編

問奇類林皇明諡紀類編象賢錄

翁夢鯉

字希登莆田人嘉靖庚戌進士歷戶部主事權許墅關以倭寇蹂躪請蠲歲額時論寤之尋謫

潮州通判時倭患彌棘夢鯉攝守事鮑浦南灣三河之戰皆身先士卒前後斬馘七百有奇蹈水死者以

千計倭遁去廣寇張璉吳高等復竊發夢鯉授方畧  
擒之移知開州比行復解程鄉圍而去倭寇惠州乃  
移惠州同知與總兵俞大猷叅將湯克寬會勦擒斬  
無算會興寧拓林間嘯聚甚衆巨盜出沒海島中南  
頓撫臣疏請自嶺以東特設防海僉事以夢鯉為之  
於是平河源服五峒大星港擔竿洲所在奏捷威名  
大振以勞  
瘁卒於官

林大黼

字朝介莆田人嘉靖壬子鄉薦知浙川後補河  
源會大水民饑發粟四百石賑之又修復古城

以捍水患改知上元尋以戶曹郎出守銅仁有當道  
私憾土司囑大黼誣以他事褫其廕大黼曰吾平生  
不能殺人以媚人况殄人血食乎遂拂  
衣歸子咨益萬厯己未進士刑部主事

鄭茂

字士元莆田人嘉靖癸丑進士授海鹽今時兩浙  
數被倭茂至堅城濬河增築女塙建敵臺募健卒

以戍要地明春倭大至民人數千爭入城諸衛官懼怯請疾閉門茂戒獨啟西門躬往涖之悉入避寇者乃籍丁壯授兵登陴每堞軍一民二更番乘城時徵服巡行獎勞扶惰衣寒餉餒攬涕煦哺士盡感奮賊倦解圍去乙卯正月倭復至沙賊千餘人適由金山南來與合將入境茂密飭健士三百伏海塘蘆葦中俟其過砲石齊發鼓聲動天地倭負傷逸五月復出掠海鹽茂整衆以待倭不敢近其冬倭舟泊秦駐鵬茂與指揮徐行健乘不意即日撲滅之丙辰春拓林賊趨圍乍浦行健往援衆寡不敵被創死茂得報慟哭以忠義獎吏士人爭奮激賊聞之宵遁入為兵科給事中合邑士女號哭三日萬厯初累遷河南按察使左邊府江備兵時高天古帶諸巢作亂茂督兵進勦斬首數百級餘奔潰乃於六巢各設一堡置兵屯守殘黨帖然先是兩岸諸徭憑險出沒伏箬勾劫當事不能禁於是灘沖魚鹽之例官民船非聚至百

不敢發茂上狀軍門大集漢土軍民搗其巢斬首千二百有奇又以三峒為諸巢腹心攻二土司屯兵扼之開仙迴馬尾二營以通永安復廣運足灘二堡以控府江創昭平縣治以控平梧星羅碁布刁斗相聞殘猛斂跡鹽政不滯行旅安然皆出茂力云

陳志

字思尚莆田人嘉靖癸丑進士授行人推監察御史按南京以北四郡時島蠻內訌武備久疎志念

鳳陽為祖宗陵寢地而淮揚則漕饑都會乃督師走泗上逼賊壘而陳境內以寧又疏發帑金萬餘兩粟麥萬石以賑淮揚饑民移按江右陞大理寺丞旋晉少卿拜僉都御史巡撫勳陽與南贛撫臣有郊中蜚語罷歸卒

林潤

字若雨莆田人嘉靖丙辰進士除臨川令嘗以事之永豐盜猝至城幾陷潤為畫戰守便宜賊遁去

永豐人刻石紀之遊南御史巡按江西嚴世蕃置酒  
為別諸御史不敢吐一語潤獨高談不顧至南省首  
論祭酒沈坤下獄死副都御史馮懋卿為嚴嵩最幸  
門士夤緣內降權鹽秦晉吳楚問所至騷擾潤以狀  
上聞伊王典楨惑術者言請拓府第先遣人賂嵩報  
可潤並具條上且詆及嵩復疏世蕃及中書羅龍文  
大逆狀御史鄒應龍亦以為言世宗怒罷嵩相戊世  
蕃於雷州龍文於澤州懋卿亦坐戊伊藩坐奪爵既  
而世蕃復亡之家龍文又數入奏州與世蕃計事會  
潤按視上江得其往還踪跡具疏發之世宗即下潤  
捕治時世蕃子尚官錦衣急足報世蕃世蕃急赴戍  
潤馳下九江遣軍追捕則世蕃到戍繞二日遂鉗以  
行而龍文自分宜走入梧州梧守聞詔直於謁舍收  
之潤送世蕃之京師復論其里居諸背逆不法事有  
旨誅世蕃龍文逮其黨與籍其家嵩獨身寄客以死  
於是世宗知潤權南京通政司叅議累陞遷都御史

開府蘇松始至官江南大吏曰夫夫也死祭酒削藩  
王戍都御史餒故相磔侍郎與中書舍人者也咸屏  
息莫敢仰視潤則寬然長者所按部延父老訪疾苦  
上封事十餘條詞極懇切尋卒於官年僅四十先是  
莆城陷潤疏請蠲租三年仍乞帑金復建學宮并予  
諸生金郡人德之祀於學宮西偏又修築東南海隍  
祠祀焉  
里人特

林焜章

字振世莆田人嘉靖戊午舉人歷國子助教出  
丞平樂以平壘功三拜金幣之賜晉守澂江地

多疏珀空青諸珍物焜章一無所取復補馬湖值採  
木用兵之際道路騷然故事上司差役得給戶馬又  
例索惜馬錢焜章捐金買馬數十匹飼以積粟供驛  
遞戶馬由是罷丙戌入覲以老歸居鄉二十餘年一  
室僅蔽風雨足不及公門督學  
耿定力校士至莆請見不出

林澄源

字仲清莆田人嘉靖己未進士由戶部郎出為貴州叅議屬水西安酋作亂當事者議勦澄源

獨議撫已而兵出無功卒用其言事遂定踰年晉按察司副使備兵威清即用前所撫安酋授以方畧寇發輒擒之滇黔晏然陞叅政歷廣西按察使轉四川右布政使乞終養歸皆有悟往吟及經傳講義若干卷

彭文質

字在份大治子嘉靖己未進士授揭陽令禦倭有功擢戶部主事歷官廣西叅政時議征八寨

猛幕府以兵事問文質對曰兵者不得已而用以弭亂靖民耳倘藉為功伐非所知也幕府欲容嘆服即以督餉紀功委焉先是靖藩驕甚以葬母妃故縱舍人子椽括竹木為民言文質一切裁之被謗歸子憲范字正休萬曆戊子舉人由教諭歷官貴州兵備副使

游曰章

字學綱莆田人嘉靖己未進士初知臨川縣有巨猾師姓者武斷於鄉曰章捕治之流寇至開

城納逃難百姓并力守禦賊遁去擢刑部主事晉員外郎萬厯改元擢廉州知府著有學庸釋義洪範釋

義三餘集

百餘卷

陳經邦

字公望莆田人嘉靖乙丑會試第二人選庶常授編修神宗在東宮充講官御極日陞修撰

復充經筵每進講條析敷陳吐音洪亮神宗改容聽之呼為白面先生而不名親灑責難陳善四大字賜之時當秋試經邦於例宜典南畿以張居正子在南雍辭不住居正奪情京僚皆希旨疏留經邦獨否以此卿之數年不遷居正卒始擢禮部侍郎晉尚書會壽宮役興臺省異議經邦奉命覆視不盡如輔臣指

喉言官論之遂乞歸



林大經

字世典莆田人隆慶丁卯舉人以教諭擢知彭澤縣時海寇林道乾林鳳勢猖獗大經繕甲增

堡賊不敢犯復招降藍田山寇劉興策并井其地得田千餘畝詔賚金幣累遷知石阡府單車馳赴諸不便民者悉罷之剖決無留獄民有不解擔之謠厯官十七載疏布終身而卒

陳瑛

字廷玉莆田人萬厯甲戌進士授南戶部主事改工部虞衡司督造清河漕艘以舊版佐築河又裒

新版之羨築高家堰以功遷都水郎中董中河事因開梁山新河經羊山至古洪十有二里又開境山故河以助梁流省水衡金錢無算復以寶應月河成擢山東左叅政晉廣東按察使河復決睢邳閭名還為徐淮兵河道與司空潘季馴築新舊大堤及橫園月堤塞決口三砌滾水壩四大壩二十有二陞右布政使以外艱歸卒河壩之民至今祀之

林鏞

字毅卿莆田人萬厯丙子舉人知臨淮縣中使李鳳所遇騷擾鏞極力與抗遂被誣奏廷杖下獄後

因災異得釋里居十餘載俄以薦起而鏞已卒鏞廷杖繫獄時臨淮之民日夜禱神其詞有曰趙廣漢之

蒙冤萬人伏闕夏侯勝之繫獄終

日投書天啓初贈尚寶司少卿

林道楠

字廷任莆田人萬厯癸未進士授進賢令歲饑發粟乘小艇徧歷窮鄉計口賑給夜則就舟小

憩不入民舍擢御史厯按應天陝西廣西有侍郎某

以所親郡守為囑守墨甚克劾落職厯陞太僕少卿道楠居臺十八年遇事侃侃劾太監張鯨論司馬石星主封事棟御史曹學程丰采著朝右以封藩道卒

海內重其清素

林克俞

字咨伯莆田人萬厯己丑進士授庶吉士厯南祭酒連疏乞歸熹宗政元起禮部侍郎旋拜尚

書會光宗實錄成擬進御製序有金滕無圭璧之文  
靈藥寡瞑眩之効等語不為權貴所喜又奉旨選閣  
上疏力爭引祖制訓詞有願垂履霜之戒毋啓旁落  
之端語尤諄切逆璫魏忠賢敬慕堯俞嘗治第求書扁  
弗應遂請旨命書堯俞承旨不得已書畏天堂三字  
忠賢不樂恚云宗伯豈無意綸扉耶何屢張奉相向  
堯俞笑謝曰予知祖制不計其他及奉旨會同選閣  
忠賢欲沿故事上坐堯俞曰公等原由本部選進安  
可一旦輒相躋躡忠賢氣沮均席罷去懷冲太子之誕  
忠賢與客氏謀詭秘幾危母后堯俞呼中涓曉以古  
今順逆報應中宮始安他如抑選侍李氏封號責朝  
鮮李輝大義俱有定讞既而黨禍漸起屢疏乞休踰  
年卒贈少保諡文簡著有谿堂詩集四卷文二  
卷子鼎銘庚戌會試第三人官至南光祿少卿

戴士衡

字章尹莆四人萬厯己丑進士知新建縣擢吏  
科給事中時倭寇關白犯朝鮮遼左震動樞臣

石星主冊封遺沈惟敬往士衛上疏力言倭情必不可信封事必不可成惟敬市井無賴必不可任宜諭朝鮮亟修戰具增兵逸左以防其變復條石星欺誤六大罪上備倭八策後皆如所料又請聖駕迎奉太后神主宜虔昌平開礦有傷陵寢地脉宜罷神宗皆嘉納之後上國本一疏言天下根本大計宜早立皇太子臣不敢效豐亨之談願附憂危之誼且言不可知者三大可慮者五喫緊宜圖者一辭甚切直坐謫戍二十餘年故歸卒天

啓中贈光祿少卿

盧廷選

字鉉卿莆田人萬曆壬辰進士知滄州時方興橫海舟師大軍出於滄供億繹屢廷選取應有

方無敢譁者巨瑞拔稅柄凌轅州縣廷選以民艱與語詞色從容瑞慙沮而去歷工部郎中出知南昌府修東西二湖弛漁利以予民陞江西叅政以蜚語拂衣歸起補湖廣叅政卒於官著有四書質義尚書雅

言浴碧  
堂集

俞維宇

字憲喬莆田人萬曆乙未進士授戶部主事累遷山東叅政捐俸重新孟子廟刻碑紀事厯轉

湖廣左布政使時各直省鄉試榜前列欲得魏姓以媚瑞楚闈榜發任事者惟恐失魏姓人維宇為提調獨鴈聲曰立賢無方謂何至公堂上宜容徇私以此忤意遂拂衣歸瑞敗擬擢巡撫會內艱未闋而卒

黃起龍

字應興莆田人萬曆戊戌進士授行人厯拜南給事中時東官久罷講筵福藩封不就國朝臣

莫敢言起龍受事激切上疏中外黷之有黃緣宦寺出入織造局為奸者起龍力按其罪所策邊事皆有先見又請復建文年號謚靖難仗節諸臣及為鄉先正彭韶黃鞏馬思聰請易名上君德國典經濟災異修省弭邪諸疏俱不報遂乞休後起廣東按察使卒於道有留臺奏議四卷

周如磐

字聖培莆田人萬厯戊戌進士選庶吉士授檢討累陞少詹事兼侍讀學士熹宗改元為禮部

右侍郎晉禮部尚書拜東閣大學士時黔筑印竿間盜熾朝議欲會赦省兵勦之如磐以為不可密授撫臣方畧誅渠魁赦脅從不數月而平加太子太保文淵閣大學士以事局日變憂悴成疾四疏乞歸未出都而逝如磐初在詞林值神宗在位久儲嗣未定慨然曰國家之事孰有大於此者上書首輔王錫爵以力請建儲為第一義及三王並封之命下如磐再疏諫後光宗在東宮覽其奏有忠直可嘉之褒入直僅四十餘日卒贈少保謚文懿

俞誨

字忠伯莆田人萬厯辛丑進士初令新喻入為戶部主事權雲南道御史疏劾江西稅監李道縱役

剝商釀盜起釁狀乞正法復請瑞王之藩及二王婚封不當踰期東宮講學不當久輟語甚剴切巡按廣

西議鎮土州省郵符殊交函糾強宗黨羽西陞以寧  
厯轉湖南左布政時魏璫熾談誦德者疎金立祠詢  
峻拒之禍幾不測璫敗  
陟南太僕卿未任卒

黃鳴喬

字啓融莆田人萬厯甲辰進士知番禺縣歲祿  
捐俸為糜全活甚眾以不狗臺使意謫郡幕遷

安慶推官縣令某以酒獻發之金也叱持去晉南戶  
部主事出守袁州袁土瘠賦重視他郡什百向有永  
不加派之例熹宗初稍議增至是鳴喬力持前列表  
人德之權河南按察副使解組去子起維天啓甲子  
人舉

林光庭

字冲明莆田人萬厯甲辰進士知閩鄉縣明習  
吏事屢決疑獄以薦調襄陽邑多彊禦過客掠

子女光庭設方略擒之郡司理黎某素寵一掾以事  
被訐光庭繩之急遂遭媒孽左遷補知寧海縣首葺

方孝孺祠請特祀寧民久困里役有保戶押差火耗  
滴珠等錢光庭悉為蠲除民如釋重負擢戶部主事  
奉命督河南糧儲所過凶荒便宜發賑歷員外郎  
中出守武昌政務寬厚士民懷之丁外艱歸尋卒

柯臬

字季和莆田人萬曆甲辰進士知鄞縣有聲擢南  
戶部主事權揚州鈔關恤商捐羨除回空漕船陋

規出守河間治行稱三輔最遷易州道有神明之譽  
累遷都御史巡撫山西在任二年邊備振飭百度改  
觀以母老乞歸  
養母歿哀毀卒

黃諫卿

字箴伯莆田人萬曆丙午舉人以廣信推官擢  
御史巡鹽兩淮轉四川兵備張獻忠猖獗諸宦

蜀者多畏縮不前諛卿慨然就道至瀘州遇賊抗節  
不屈死僕鄭奇等五人俱殉難崇禎辛巳贈太僕卿

唐際盛

字士瑩莆田人萬曆丁未進士授祁門知縣歷  
知真定府以失權貴意歸起知廣平累遷都御



史提督操江嘆武備廢弛大治戰艦廣募水兵援表  
天授於行伍以統之適粵寇蹂躪江右召際盛赴援  
賊聞風解散以  
父喪歸抵家卒

周煬

字鉉吉莆田人萬厯丁未進士知曹州以贖銀許  
民輸布絮因製衣以給寒者厯湖廣督學僉事分

守荆西征蜀官兵擾民煬密白巡撫嚴約束而躬自  
慰問勞苦威惠並行衆始戢有奸民仇某甲詐為其  
人謀亂書與獄囚約內應故委於道吏得之大怖煬  
曰此反間計耳密偵之當再至奸果獲衆欽其神年  
四十年  
於官

陳騰鳳

字鳴周莆田人萬厯丁未會試第二人授開州  
知州州多巨憝要劫行旅騰鳳計誘渠魁殺之

賊徒屏息調太倉州屬邑有浮糧七千五百餘石民  
困於供騰鳳稽覈清制遺累洒然陞兵部員外郎督

學河南轉浙江副使乞終養歸著有四書講意尚書要言靜虛齋集若干卷

潘應龍

字元辰莆田人萬曆丁未進士初知揭陽擢南刑部郎歷陞廣東右江道備兵賓州地近土司

疏瘠瘴癘應龍加意拊循家為尸祝龍山賊破潯州撫臣知應龍才畧檄督兵往應龍方報遷川東叅政念母老欲告歸得檄遂以討賊自任日與諸將領規度陵谷險要情形冒犯霜露會染瘴卒賓潯之人咸為悲涕事聞贈太僕卿賜祭葬廕子令有司建祠祀之

茅序

字邦賓仙遊人萬曆己酉舉人知筠連邑近水西國女主祿氏寇成都邑為要衝且無城民勸入洞

避之序曰職在守土有死無二率民兵禦之遁去人有鐵茅之號乃請創築城垣遂為巖邑後歸隱於紫

芝山年八十二卒

陳元藻

字爾鑑莆田人萬厯庚戌進士授行人陞禮部主事會日食疏言陽掩於陰刑餘之人豈可使

預國家事魏瑞見之恚甚欲置之死首輔葉向高力救得免出為江西叅政擢貴州布政使以父老乞養

歸結茅於梅峰之麓托詩畫以見意著有頌吟集年九十餘卒

吳兆元

字公策莆田人萬厯癸丑進士授確山令累遷知韶州府崇禎改元郡守卓異賜宴者四人兆

元第一厯陞雲南左布政使入覲軍民土司送者至馬不得行擢本省巡撫召見平臺御賜銀幣因面陳

機宜獎勞有加甲申闖賊陷湖兆元痛哭勤

王鞠躬盡瘁卒於官臨歿無一語及私云

曾楚卿

字元贊莆田人萬厯癸丑進士選庶吉士授檢討時天下承平詞臣以觴咏為娛楚卿獨下帷

精討嘗貽書樞部勸其及時選將練兵無蹈後悔後皆如其言天啓初厯轉詹事府詹事冊封德藩復命

途值葉向高赴召謂之曰宦侍勾萌官闈將變計將  
安出向高為愕然不二載言皆驗轉尚禮部侍郎巨  
璫矯旨以少宰張鶴謗議朝政楚卿出其門并削籍  
崇禎改元起為禮部左侍郎陞見陳敬天法祖魁民  
困寬刑獄豫邊防五事轉吏部左侍郎進禮部尚書  
與輔臣溫體仁杻鑿累疏乞休卒著有崇坡集十二  
卷曾城集六卷  
銓畧日錄二卷

林贄

字季宣莆田人萬曆丙辰進士由戶部郎歷都御  
史巡撫廣西衡永礦寇作亂桂邨求援贄移鎮全

州調度兵食擒賊秦凱靖江藩有反謀欲邀贄城外  
觀操勢謂親王不典兵祖制也且出城有禁藩又言  
土司願共伐安南自備十萬兵得撫軍一檄允其統  
率可成大功勢以無故用兵屬國非請旨不可藩知  
其有備遂不敢動復糾劾巡按御史某贓私狀墨吏  
成望風解綬後予告歸卒從兄鳴瑞字朋石同年進

士令諸暨有聲以戶部主事出監淮安  
稅與權璫忤棄官歸風節並重一時云

彭汝楠

字伯棟文質孫萬厯丙辰進士知會稽縣擢禮  
科給事中追論李可灼不宜崇賞崔文昇不可

赦選忤旨幾殆旋巡視京營轉吏科疏糾逆璫冒秩  
濫廕及虛耗錢糧等事不報隨有冊封海外之役陞  
辭復上言楊漣參魏忠賢疏罪狀著明未蒙處分語  
極激切及復命又率六科伏闕請省刑薄斂以回天  
變魏璫矯詔奪職崇禎改元起大理丞厯陞兵  
部左侍郎以議勦寇異同遂乞休年六十卒

黃鳴俊

字啓甸莆田人萬厯己未進士知諸暨縣調會  
稽陞禮部主事時魏璫勢張甚請間導意鳴俊

弗應轉員外郎累遷江南糧儲道以忤相臣周延儒  
調督糧山東陞都御史巡撫浙江履任甫三月闖賊  
陷北京鳴俊灑泣誓師將出值

江南馬士英用事乃解綬歸

王家彥

字開美，蒲田人。天啓壬戌進士，知開化縣。擢刑科給事中，疏言錢法鐵廠班軍新餉漕政邊政

及閩海事宜，皆切中時弊。歷陞太僕寺卿、晉戶部右侍郎。李自成亂京師，戒嚴特擢兵部右侍郎協理戎政。家彥即日登城，歷九門，整器仗修壁壘，中約束別勤惰，晝夜不少懈。七月，解嚴已而自成偵知虛實，再窺畿輔，攻益急。家彥守安定門，親冒矢石，賊以內應從旁門入，乃望闕叩頭哭曰：「臣力竭矣，無以報陞。」下請一死，以從。辱國之慘，遂自經死。鄉人鄭塗為收殮其尸。

林一柱

字元功，莆田人。天啓乙丑進士，知陳州，調汝州。河南巡按檄屬邑祠祀魏璫一柱，不應。璫誅遷

戶部員外，出知常州府。父艱，服闋補吉安，修白鷺書院，置田贍士陞嶺北僉事。至贛捕左道張普，殺誅之。轉山西按察使，晉都御史，撫贛。先是嶺南八排寇蔓延窟穴不可制，一柱至，集兵乘銳不數月，次第削平。

復分兵討平漳郡寇張獻忠蹂躪全楚窺江右一柱  
預為防備獻忠不敢近豫章乃流入粵界仍遣兵赴

援闕賊陷京師北向痛

哭率師勤王卒於顛

戴震雷

字釋默仙遊人天啓丁卯解元授歸化教諭以  
性命經濟文章三事課諸生陞崇仁知縣歲饑

立粥場三十六所活人萬計鄰邑兵民激亂當事議  
勦震雷曰此民也鋌而走險耳單騎諭降之丁外艱

歸遂不仕年五十四卒兄震

亨崇禎壬午鄉薦知鉛山縣

林不息

字司箴莆田人崇禎戊辰恩貢知臨湘縣蒞任  
二月殲大盜二百七十餘人攝平江巴陵二邑

篆癸未張獻忠陷武昌所過望風逃遁不息誓死守  
城蓄殺萬石散守陴百姓人有固志獻忠以百騎來  
偵不息掩獲二十七騎戮於城上遣使持書與母訣  
殺守備益堅賊悉眾來攻城陷不息被執勸之降不屈

斷左手得邑篆於腰間斷右手又割耳鼻大罵不絕聲死獻忠令賊黨祭之瘞於北門外門生湯身之蕭露茂等數十人同殉難一僕在署聞變自沈於河事聞贈湖廣按察司僉事

**林佳**

字漢宗莆田人崇禎甲戌進士歷官禮部郎中宗伯林欲楫器其才一時典禮悉出其手出為

廣東提學副使公慎自矢凜若神明明亡蹈海死

**曾英**

字彥侯莆田人初應巡撫張肯堂募擊尤溪平和山寇常先登後入蜀以征徭功晉都司又與流賊

過天星戰於光安州投十三崖都司屢戰屢捷賊不敢近成都時闖賊陷京張獻忠乘間至英迎擊大敗之國朝順治初大師入蜀獻忠死餘賊數萬從叙州下詭降英英不許欲盡殲之忽軍中自亂英中矢躍入江中死



周金湯

字憲洙莆田人少折節讀書善詩賦及壯好孫吳兵法因學劍槊弓馬皆精其能崇禎庚辰以

武經成進士見四方亂起乃歷吳楚兩粵徧觀山川屯兵阨塞習其邑中少年豪傑三年歸挈妻子寄陽江海島中與訣曰國家多難當馬革裹尸圖報萬一吾今委身朝廷若輩勿以我為念乃謁選得上湖守備訓練精銳累著戰功以智勇稱後死節於粵東粵人葬之嘗手註道德經金剛經選唐詩明詩惜文稿散佚不傳

林尊賓

字蕪公莆田人崇禎壬午舉人肆力於六經諸史百家著春秋傳於三傳外別有發明又以禮

記附會成書乃翻去陳言著為評定復取朱子未成之志合三禮而通之綴文成類共得十篇名曰古禮當然一時倪元璐張溥陳子龍錢肅樂輩皆折節下之計偕入都見時事日非憂憤形於詞色迨闖賊陷

京與從叔說同矢殉國說卒算  
膏亦以節死著有鴈園集四卷

黃斌卿

字明輔莆田人崇禎中以父起鳴難廢百戶弱

將遷浙江副總兵駐防舟山招撫賊船百餘艘降其  
魁陳虎威名益著侍御左光先愛其才請往金華勸  
許都寇平之鎮定海關甲申聞變率舟師入援為馬  
士英阮大鍼所沮浮海歸後死節於舟山斌御性沈  
毅好聚書夜必張燈讀史雜鳴治軍日以為常著有  
來威堂存稿東南紀畧駢麗疏抄閩浙雜咏數十卷

國朝

林煇章

字繼袞莆田人崇禎壬午舉人國朝順治中  
授平樂推官所屬荔浦臨賀間寇過蠻峒剽悍

難化煇章宣示德意恩威並用民皆丕變遷惠州同  
知權守鞏昌加意拊循禁濫徵請蠲積逋十餘萬綜

理簿書每至夜分不輟以勞瘁卒於官

林友玉

字二史莆田人順治戊子舉人知應州時州縣

而令民受累吾不忍也獨不報又請免荒地賦三千四百餘應民懷之從家居嘯詠自娛有榕樓詩文集

世行

林正芳

字茂遠莆田人順治壬辰進士授刑部主事躬

反保定莊人有夜輦米遭掠者旦大索逮無辜百餘家正芳白其寃得釋保定人立石頌德以親老乞歸

值耿逆之變義不受汚手纂經籍以賦詠自娛著有立齋文稿東林詩草各一卷

張松齡

字鶴生莆田人順治乙未進士選庶吉士嘗扈從遊南苑試詩稱旨擢給事中疏請選官回

籍候憑仕途便之奉命清刑獄疏錢法不撓權勢尋轉四川參議四川承周敞後民多竄入四土府松齡贖回七千餘人給牛種加意撫綏流亡漸復土官以重賂求接壤荒地為畜牧松齡曰尺地為朝廷守之安得妄與以裁缺歸值耿逆變作逼受逆職不從被囚數月終不屈卒

劉從龍

字孟乾莆田人順治丁酉舉人知遂安縣耿逆變起圍衢州不下間道從開化寇遂安從龍率

民兵登陴固守賊帥數以書招之從龍函其書併所獲逆黨上之督撫有堅守孤城誓死無二之語總督李之芳疏聞有旨劉從龍三首逆書忠貞可嘉俟事平日以員外郎用會以病歸卒年七十六

程甲化

字季白莆田人順治辛丑進士授諸城令邑積通至二萬餘甲化設法清覈去蕪併包攬之弊

以艱歸值耿逆變作不受逆職補知旌德縣旌俗倚人命為報復株連疊案甲化嚴為整飭民甚賴之甲

子以治行選吏部文選主事歷驗封考功員外郎轉  
稽勲文選郎中凡銓序次第進退可否比例較勘纖  
悉畢照或有言例宜稍改者甲化曰天下事因之易  
革之難惟視其弊實所至就中調劑使賢路廓清弊  
不得逞無更化之名而有更化之實斯為善耳眾服  
其篤論歷通政司左右叅議太僕寺少卿推大理寺  
少卿卒弟覲化字季序康熙甲子舉人初任浮梁令  
內擢工部主事累遷刑部郎中出守東昌創建聊城  
文廟修陞舉廢不遺餘力以勞  
卒於官郡人思之祀名宦祠

彭鵬字奮斯莆田人順治庚子舉人康熙甲寅狀逆變  
起逆平授三河令邑地瘠當要衝旗民雜處鵬拊循  
釐剔不畏強禦有中夜矯傳內旨者鵬察其詐延  
與語陰遣發其橐奸狀畢露立置法每決獄發摘如  
神吏民不敢欺鄰邑有疑獄不能決憲司委鵬往軌

白其寃以囚逸報罷特旨留任上東巡駐蹕三  
河蒙顧問賜帑金三百明年詔舉天下庶能

官摧鵬第一假請歸葬即家起工科給事中會關中  
旱蝗赤地千里鵬三疏陳三輔顛連狀詔發楚米

三萬石賑之瘡痍立起居言路歲餘彈劾不避權貴  
直聲震朝右出効河工選補刑科權點泉以合都御

史巡撫粵西墨吏望風解綬去粵西舊未設武科至  
是始奏行之辛巳調撫粵東下車日收民詞五千鵬

愀然曰堂上一點珠民間一點血健訟何為民咸感  
悟悔罪值歲早步禱日中詣獄慮囚開倉平糶甘澍

立沛未幾病篤上特遣中書馳視甲申卒於官遺  
疏上奉旨有實心供職克盡勤勞之褒賜祭葬

粵人肖像祀之著有古愚心言八卷

### 劉渭龍

字載公蔚田人康熙丙午舉人甲寅之變臥逆  
欲招致之屢加逼脅渭龍剪髮匿深山露眠草

食幾決旬不勝其德遂以  
死雍正三年祀忠孝祠

朱翰春

字鷹上箭田人康熙丁未進士耿逆變亂逼令受職翰春毀形不出逆平謁選得高苑令時值

饑饉里巷為墟翰春招集流移支動公帑給與牛種民獲休息建祠祀之遷刑部郎中出守臨安踰年卒

陳維屏

字選士其先江南常州人父明任興化守備因家馬維屏有才畧總督姚啓聖令率兵千餘扼

泉南以克東石功授興鎮左營守備與吳英收復澎湖功加左都督遷陝西寧夏鎮遊擊康熙丙子正月

召見乾清宮

賜蟒服扈從西征噶爾丹守甌金

策應糧餉

大帥凱旋甌金未奉撤回至九月始令

班師維屏以孤軍食盡敵人必乘間來躡乃自為斷後敵果以數萬衆追之維屏率所部僅十餘騎自旦至昏殊死戰兵矢俱盡猶振臂奮呼斬殺數級身被重創渡至三八河卒事聞賜祭墓廕一子守備

聶國翰

其先江南和州人父昱張任興鎮遊擊遂籍於箭國翰弱冠爛時射曉勇絕倫由臺灣把總以

功歷陞遊擊值臺匪告警總督覺羅滿保令協辦軍需授象山副將施粥賑饑碑頌載道推金門鎮總兵官旋調南灣屢際歲歉人乏食國翰捐貲運米分別賑濟全活無算性喜儒術創建義學令軍民子弟咸就誦讀復增置學田以資膏火尋卒於官紳士兵民絡繹哭奠 詔贈都督僉事祀忠義祠



福建通志卷四十四